

ROSA ANA PRADA QUEIPO, SECRETARIA DO CONCELLO DE AMES NA PROVINCIA DA CORUÑA

CERTIFICO: QUE O PLENO DESTE CONCELLO LEVOU A CABO SESIÓN ORDINARIA O 27 DE FEBREIRO DE 2014, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE.

ACTA DA SESIÓN ORDINARIA LEVADA A CABO POLO PLENO DO CONCELLO O DÍA 27 DE FEBREIRO DE 2014.

No Salón de Sesiões da Casa do Concello de Ames, ás vinte horas (20:00) do día 27 de febreiro de 2014, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde **Santiago V. Amor Barreiro** e coa asistencia das/os señoras/os concelleiras/os seguintes:

Grupo municipal Popular	Grupo municipal Socialista	Concelleiras/os non adscritas/os
M ^a Eugenia Martín Vicente Bernardo Moar Míguez Alfredo Taboada Alvelo M ^a Carmen Verde Leboráns	José M. Miñones Conde José Francisco Doval Galán Isabel González Cancela Carmen Fraga Crespo José Pazos Balsa Francisco Villaverde Marcos	María Pilar Candocia Pita Susana Mallo Redondo Olalla Alvite del Río Ramón García Argibay María Dolores Fernández Álvarez Manuel J. Ferreiro Santiago Alfonso Rey López María González Gómez Emilio Martínez Carballeira

Non asiste pero xustifica a súa ausencia o concelleiro Xosé Anxo Doval Rey.

Asiste o **interventor**, José Antonio Rueda de Valenzuela.

Actúa como **secretaria** a titular da Corporación, Rosa Ana Prada Queipo.

ORDE DO DÍA**A) PARA DAR CONTA****Punto primeiro.- Dación de conta ao Pleno da Corporación dos decretos ditados pola Alcaldía dende a última sesión plenaria ordinaria.-**

O señor alcalde, **Santiago V. Amor Barreiro**, informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Punto segundo.- Dación de conta do seguimento do Plan de Axuste 2013.

O señor **alcalde** da conta do seguimento do Plan de Axuste 2013 figurando no expediente a remisión deste seguimento ao Ministerio correspondente.

Punto terceiro.- Dación de conta sobre trámites solicitados ampliación EDAR Bertamiráns.

O señor **alcalde** da conta de que o pasado día 21 de febreiro tivo entrada no Concello unha solicitude de información urbanística por parte da empresa que fixo o anteproxecto de ampliación da estación depuradora de augas residuais de Bertamiráns.

B) PARA DELIBERACIÓN E ACORDO

Punto cuarto.- Aprobación de actas anteriores.

O señor alcalde, **Santiago V. Amor Barreiro**, somete a aprobación a acta correspondente á sesión ordinaria de 23 de decembro 2013. Non se producen intervencións e dita acta resulta aprobada por unanimidade dos membros presentes da corporación municipal.

Punto quinto.- Compatibilidade de Mónica Antelo Martelo.

Durante o transcurso deste punto da orde do día intervéñen e solicita que conste en acta a concelleira **Olalla Alvite del Río** para dicir: “Boas noites. Tal e como dixemos xa na comisión informativa, queríamos deixar constancia de que aínda que sabemos que por normativa ten que vir este asunto ao Pleno, parece un pouco “ridículo”, non sei se chamarlle así, que o que cremos que é un dereito laboral teña que ser sometido á votación”.

(.....)

Rematadas as intervencións o pleno da corporación por unanimidade dos seus membros presentes adopta os seguintes acordos:

Primeiro.- Autorizar a compatibilidade da traballadora do Concello de Ames, Mónica Antelo Martelo co posto de profesora asociada a tempo parcial na Universidade de Santiago de Compostela, por darse os requisitos esixidos na Lei 53/1984 de 26 de decembro de incompatibilidades do persoal ao servizo das administracións públicas e sempre que se manteñan as condicións existentes no momento da solicitude.

Segundo.- Facultar ao alcalde presidente do Concello de Ames, Santiago V. Amor Barreiro, para cantas actuacións de trámite sexan precisas para a mellor execución do acordado.

Punto sexto.- Aprobación inicial do Regulamento da Xunta Local de Seguridade do concello de Ames adaptado ao Real decreto 1087/2010, de 3 de setembro.

Durante o transcurso deste punto da orde do día intervéñen e solicita que conste en acta a concelleira **Pilar Candocia Pita** para dicir: “Boas noites. A nós parécenos ben que haxa unha adaptación como esta, cando hai un cambio de lei, porque se dependera, deste goberno non habería ningunha adaptación. Non foi capaz de redactar un regulamento de Pleno para adaptarse á nova situación política xerada no concello. Levamos dous anos, os non adscritos do grupo de Ames Novo, dous anos que nos fomos do BNG e logo se foron os de Pacto x Ames creo que hai un ano, mais ou menos, e vostedes foron incapaces de resolver o problema. Menos mal que non depende de vostedes o cambio deste Regulamento que ven a pleno, senón tampouco se faría. En todo caso chamar a atención de que cando convén se adaptan moi ben ás normas e nos parece ben que se adapte a Xunta Local de Seguridade á normativa, faltaría mais, pero notamos que hai unha vara de medir diferente segundo sexan as problemáticas e queremos deixar constancia diso neste pleno. Mais nada, moitas grazas”.

(.....)

Rematadas as intervencións o pleno da corporación por unanimidade dos seus membros presentes adopta os seguintes acordos:

Primeiro.- Aprobar inicialmente o Regulamento da Xunta Local de Seguridade do Concello de Ames cuxo texto figura como Anexo I deste acordo.

Segundo.- Someter o Regulamento a exposición pública por prazo de 30 días hábiles a efectos de exame e reclamacións, mediante anuncio no Boletín Oficial da Provincia, taboleiro de anuncios e páxina web municipal. De non presentarse reclamacións, a aprobación inicial quedará elevada a definitiva de maneira automática.

Terceiro.- Facultar ao alcalde presidente do Concello de Ames, Santiago V. Amor Barreiro, para cantas actuacións de trámite sexan precisas para a mellor execución do acordado.

Anexo I

Exposición de motivos

Tal e como establece a exposición de motivos do Real Decreto 1087/2010 de 3 de setembro polo que se aproba o Regulamento que regula as Xuntas Locais de Seguridade, e a Lei Orgánica 2/1986, de 13 de marzo, de Forzas e Corpos de Seguridade, proclamase como ben xurídico a protexer a seguridade pública,

cuxa competencia corresponde en exclusiva ao Estado con participación das Comunidades Autónomas e das Corporacións Locais nos termos fixados polos seus respectivos Estatutos de Autonomía e na Lei 7/1985, de 2 de abril, reguladora das Bases do Réxime Local.

Esta tarefa finalista esixe a acción concertada das Forzas e Corpos de Seguridade no seu conxunto, tanto das dependentes do Estado, como das Comunidades Autónomas e das Corporacións Locais; acción concertada que debe efectuarse a través dos órganos de coordinación operativa que para ese efecto se establecen na propia Lei Orgánica.

Un de tales órganos de coordinación, que veu demostrando a súa utilidade na procura de fórmulas realistas de colaboración policial con incidencia favorable na seguridade pública, é a Xunta Local de Seguridade, creada polo artigo 54.1 da Lei Orgánica 2/1986, de 13 de marzo, instrumento de coordinación que, sentada sobre o elemento da territorialidade do municipio, constitúe un mecanismo capaz de fixar medios e sistemas de relación ao obxecto de lograr certa homoxeneidade e facer factible actuacións conxuntas, de colaboración mutua e de cooperación recíproca.

En relación á participación na protección da seguridade pública do noso municipio, o concello de Ames, en sesión plenaria celebrada o 6 de setembro de 2003 adoptou acordo plenario de creación da Xunta local de Seguridade do concello de Ames e de aprobación do Regulamento de organización e funcionamento da mesma.

O Real Decreto 1087/2010 de 3 de setembro, polo que se aproba o Regulamento que regula as Xuntas Locais de Seguridade obriga a modificar o Regulamento aprobado no concello de Ames no ano 2003 a efectos de adaptalo ao novo marco normativo

Artigo 1. Obxecto do Regulamento

A Xunta Local de Seguridade que se regula neste Regulamento é un órgano colexiado creado por acordo plenario de 6 de setembro de 2003 para facilitar a cooperación e a coordinación no ámbito territorial do municipio das diferentes administracións públicas en materia de seguridade, asegurando de forma específica a cooperación e a coordinación operativa das forzas e corpos de seguridade que interveñen no termo municipal.

Artigo 2. Sede e ámbito territorial

A Xunta Local de Seguridade de Ames terá por sede o edificio do concello, sito na localidade de Bertamiráns (Ames), estendendo o seu ámbito territorial de competencia a todo o termino municipal de Ames.

Artigo 3. Composición

A Xunta local de seguridade de Ames estará integrada polos seguintes membros

a) O presidente: A presidencia corresponderá ao alcalde do concello de Ames, salvo que concurra as súas sesións o delegado do Goberno na Comunidade autónoma ou o subdelegado do Goberno na provincia, en cuxo caso a presidencia será compartida con aquel.

b) Vocais da administración xeral do estado:

- 1.- O responsable da Garda Civil con maior rango xerárquico de entre os destinados en Ames
- 2.- Un representante da Delegación do Goberno na comunidade autónoma ou da Subdelegación do goberno na Coruña.

c) Vocais da administración autonómica:

- 1.- Un representante a designar polo órgano competente da Xunta de Galicia.

d) Vocais da administración local: Tres representantes a designar polo alcalde.

e) A secretaría da Xunta Local de Seguridade a desempeñarán con voz pero sen voto, e alternativamente, por períodos dun ano, salvo que no seno da propia Xunta Local de Seguridade se decida outra en atención ao previsto no artigo 6 do Real decreto 1087/2010 os seguintes:

Un/ha funcionario/a do concello de Ames designado polo alcalde, os anos impares

Un/ha funcionario/a da administración xeral do estado, designado polo delegado ou subdelegado do Goberno, os anos pares.

Nos casos de ausencia xustificada de calquera dos membros da Xunta, asistirá ás reunións coas súas mesmas atribucións aquel/a que o/a substitúa.

Artigo 4. Outros participantes

Poderán tamén asistir ás reunións da Xunta Local de Seguridade sen participar na adopción de acordos outras autoridades, funcionarios ou calquera outra persoa que, polas súas funcións, coñecementos ou capacidade técnica se estime necesario.

Tamén poderán asistir os superiores xerárquicos dos vocais membros das forzas e corpos de seguridade que formen parte da Xunta Local de Seguridade.

Artigo 5. Competencias

A Xunta Local de Seguridade de Ames desempeñará as seguintes competencias:

- a) Establecer as formas e procedementos necesarios para lograr unha coordinación e cooperación eficaz entre as unidades da Garda Civil que exercen as funcións e competencias no ámbito territorial do municipio e corpo de policía local de Ames.
- b) Analizar e valorar a situación da seguridade cidadá no municipio. En particular, coñecer, analizar e valorar a evolución da criminalidade e outros problemas que afecten ao normal desenvolvemento da convivencia no termo municipal.
- c) Elaborar o Plan Local de Seguridade e impulsar a elaboración de plans conxuntos de seguridade cidadá e de seguridade vial para o ámbito municipal correspondente, evaluando a súa execución e resultados. Ditados planes recollerán as formas e procedementos de colaboración entre os corpos de seguridade implicados no ámbito respectivo de cada un.
- d) Propoñer as prioridades de actuación, as accións conxuntas e campañas de prevención que contribúan á mellora da seguridade cidadá e seguridade vial.
- e) Informar a proposta de participación do corpo de policía local ca Garda Civil nas funcións de policía xudicial, de conformidade ca normativa vixente e cos acordos de colaboración subscritos entre o Ministerio do Interior e o concello de Ames.
- f) Evaluar e propoñer a integración do corpo da policía local no sistema estatal de bases de datos policiais mediante a firma do correspondente protocolo entre o respectivo concello e o Ministerio do Interior.
- g) Arbitrar fórmulas que garanticen o intercambio fluído de toda a información que puidera ser relevante para a seguridade cidadá e normal desenvolvemento da convivencia no ámbito local, entre os dous corpos de seguridade que actúan no termo municipal.
- h) Acordar os plans específicos de colaboración e coordinación a desenvolver no municipio con motivo da celebración de eventos extraordinarios u outras situacións que aconsellen a adopción de dispositivos especiais, co obxectivo de prevenir alteracións de orde e garantir a seguridade cidadá.
- i) Promover a cooperación cos distintos sectores sociais, organismos e institucións con incidencia na seguridade cidadá do municipio. Para elo, analizará e valorará os traballos realizados no consello local de seguridade, así como a opinión das diferentes entidades sociais sobre os problemas locais relacionados ca seguridade e a convivencia, a fin de integrar na actuación pública as preocupacións e opinións do tecido social do municipio.
- j) Coñecer, no ámbito das súas atribucións, os conflitos e incidentes de competencia ocasionados entre a Garda Civil e o corpo de policía local.
- k) Cooperar cos servizos de protección civil, nos termos que se establezan na lexislación e no planeamento en materia de protección civil.
- l) Efectuar o seguimento dos acordos alcanzados, verificando o seu cumprimento e evaluando os seus resultados

Artigo 6. Funcionamento

O réxime de funcionamento da Xunta, rexeráse, no non disposto nos catro artigos seguintes, polo establecido para os órganos colexiados na Lei 30/1992 de 26 de novembro, de Réxime Xurídico das Administracións Públicas e do Procedemento Administrativo Común.

Artigo 7. Atribucións do presidente/a

Corresponde ao alcalde, como presidente/a da Xunta Local de Seguridade, as seguintes atribucións:

- a) Convocar as sesións e fixar a orde do día, sen prexuízo das propostas que poda recibir de calquera dos vocais, en concreto, verá obrigado a incluír entre os asuntos a tratar as propostas realizadas polos representantes estatais e da comunidade autónoma.
- b) Dirixir as intervencións e moderar o debate, de maneira compartida, cando asista as reunións o delegado ou o subdelegado do Goberno.

Artigo 8. Funcións do secretario/a

Corresponde ao secretario/a da Xunta Local de Seguridade o desempeño das seguintes funcións:

- a) Efectuar a convocatoria das sesións por orde do presidente da Xunta, así como outras comunicacións aos seus membros.
- b) Redactar as actas de cada sesión e expedir certificados dos acordos adoptados.
- c) Custodiar a documentación da Xunta Local de Seguridade, e calquera outra función inherente á condición de secretario/a, no ámbito das súas competencias.

Artigo 9. Convocatorias e celebracións de sesións

- 1.- As Xuntas Locais de Seguridade se reunirán en sesión ordinaria ao menos unha vez ao semestre.
- 2.- Cando as necesidades o aconsellen, poderán reunirse en sesión extraordinaria, previa convocatoria da presidencia, a iniciativa desta ou de calquera dos vocais.
- 3.- As convocatorias das reunións serán efectuadas por acordo da presidencia, acompañadas da orde do día, data e lugar da reunión, debendo notificarse con dez (10) días de antelación, como mínimo, as de carácter ordinario e con anticipación suficiente de ao menos 48 horas, as extraordinarias.
- 4.- A orde do día será fixada por acordo da presidencia cas propostas efectuadas polos demais membros da Xunta Local de Seguridade, formuladas ca suficiente antelación. Ao mesmo acompañarase copia da documentación necesaria correspondente aos distintos asuntos a tratar.
- 5.- Para a celebración das sesións ordinarias ou extraordinarias será necesaria a asistencia á reunión do presidente e secretario/a, o no seu caso, de quen legalmente les sustitua, e a de a metade, ao menos dos seus membros

Artigo 10. Adopción de acordos

- 1.- As decisións e acordos da Xunta Local de Seguridade adoptaranse por maioría dos seus membros.
- 2.- Non poderá ser obxecto de deliberación ou acordo ningún asunto que non figure na orde do día, salvo que os membros da Xunta acorden por unanimidade a súa inclusión con carácter urgente.
- 3.- Das reunións que se celebren levantarase a correspondente acta, que será asinada polos membros da Xunta que asistiran a mesma e cuxo contido quedará reflexado no correspondente libro de actas. O secretario/a enviará copia da acta ao presidente e a cada un dos vocais.
- 4.- Aos efectos de poder analizar e valorar os problemas que teñen unha especial incidencia na seguridade pública e en orde á eficaz planificación da mesma en cada ámbito provincial, a Xunta Local de Seguridade remitirá, unha vez aprobada, copia da acta ao Delegado do Goberno ou ao Subdelegado respectivo.

Artigo 11. Deberes dos membros da Xunta

Os membros da Xunta Local de Seguridade terá os seguintes deberes:

- a) Gardar reserva sobre o contido das deliberacións.
- b) Asistir ás reunións da Xunta Local de Seguridade.
- c) Colaborar e cooperar lealmente, no ámbito da súa competencia, no cumprimento dos acordos da Xunta Local de Seguridade.

Artigo 12. Órganos de asesoramento

- 1.- Como órganos de asesoramento e de apoio á Xunta Local de Seguridade poderá constituírse comisións técnicas para o estudo de aqueles asuntos cuxa natureza, especificidade ou complexidade así o aconsellen.
- 2.- A súa constitución deberá ser acordada pola propia Xunta, á que elevarán para a súa valoración, os informes, propostas e suxestións que emitan.

Artigo 13. Participación cidadá

Con obxecto de lograr a máxima participación cidadá na mellora dos niveis de seguridade pública, poderán constituírse Consellos Locais de Seguridade, aos cales serán invitados representantes de asociacións cidadás, organizacións empresariais, sindicatos e outras institucións ou sectores que conformen o tecido social.

Artigo 14. Comisións de coordinación policial

1.- A Xunta Local de Seguridade poderá acordar a constitución dunha comisión de coordinación policial, dependente funcionalmente da mesma e integrada polos xefes inmediatos da Garda Civil con competencia territorial no termo municipal e do corpo da policía local.

2.- A comisión de coordinación policial terá a función de asegurar a coordinación e a execución operativa das accións conxuntas previstas nos plans de seguridade ou nos programas operativos adoptados ou acordados pola Xunta Local de Seguridade, a quen corresponde supervisar o desenvolvemento e avaliar os resultados.

Disposición derogatoria

Queda derogado o Regulamento de organización e funcionamento da Xunta Local de Seguridade aprobado en sesión plenaria do concello de Ames de 6 de setembro de 2003

Disposición final. Vixencia do Regulamento.

O presente Regulamento, non entrará en vigor ata que se leve a cabo a publicación do seu texto íntegro no Boletín Oficial da Provincia e transcorra o prazo previsto no artigo 65.2 da Lei 7/1985 de 2 de abril, reguladora das bases de réxime local, de conformidade co establecido nos artigos 49 e 70.2 da citada Lei. E manterá a súa vixencia ata que se aprobe a súa modificación ou derogación.

Punto sétimo.- Derogación da Ordenanza fiscal reguladora da taxa pola utilización privativa ou aproveitamento especial do dominio público local polas empresas explotadoras de telefonía móbil.

(.....)

Rematadas as intervencións o pleno da corporación por unanimidade dos seus membros presentes adopta os seguintes acordos:

Primeiro.- Derrogar a Ordenanza fiscal reguladora da taxa pola utilización privativa ou aproveitamento especial do dominio público local polas empresas explotadoras de servizos de telefonía móbil en cumprimento das sentenzas, do TSX de Galicia sección 4ª, 0058/2013, recaída no procedemento ordinario nº 0015118/2012 e 00730/2013, recaída no procedemento ordinario nº0051094/2012.

Segundo.- Publicar dita derogación no BOP, páxina web municipal e taboleiro de anuncios do Concello de Ames.

Terceiro.- Facultar ao alcalde presidente do Concello de Ames, Santiago V. Amor Barreiro, para cantas actuacións de trámite sexan precisas para a mellor execución do acordado.

Punto oitavo.- Aprobación da modificación do proxecto técnico “Asfaltado e acceso aparcamento campo fútbol Milladoiro e mellora da seguridade peonil e asfaltado acceso Colexio Alca”, do Plan Provincial de Cooperación ás Obras e Servizos de Competencia Municipal (POS) 2014.

(.....)

Rematadas as intervencións o pleno da corporación por unanimidade dos seus membros presentes adopta os seguintes acordos:

Primeiro.- Aprobar o proxecto técnico en que se recollen os cambios non substanciais propostos pola supervisión técnica do Servizo de Apoio Técnico a Municipios da Deputación Provincial da Coruña:

Denominación do proxecto	Asfaltado e acceso aparcamento campo fútbol Milladoiro e mellora seguridade peonil e asfaltado acceso colexio Alca.
Técnico redactor	Julio César Rojo Martínez, Enxeñeiro de Camiños, colexio

	núm. 3.871
Presuposto base de licitación	62.559,13

Segundo.- Dar traslado do presente acordo á Deputación Provincial para a súa inclusión no Plan Provincial de Cooperación ás obras e Servizos de Competencia Municipal (POS) 2014.

Terceiro.- Facultar ao alcalde presidente do Concello de Ames, Santiago V. Amor Barreiro, para cantas actuacións de trámite sexan precisas para a mellor execución do acordado.

C) PARA CONTROL DO GOBERNO

A concelleira **Pilar Candocia Pita** anuncia que queren presentar unha moción de urxencia sobre a xornada escolar no colexio de Ventín e o señor alcalde informa que primeiro serán tratadas as mocións incluídas na orde do día.

Punto noveno.- Moción presentada polas concelleiras/os M^a Dolores Fernández Álvarez, Alfonso Rey López, María González Gómez, Manuel Ferreiro Santiago, Emilio Martínez Carballeira e Ramón García Argibay, con núm. R.E. 1640, de 12 de febreiro de 2014, sobre a construción do novo Centro de Saúde do Milladoiro.

O alcalde concede a palabra a un dos concelleiros propoñentes da moción, **Ramón García Argibay**, que di: Boas tardes outra vez. O motivo de presentar esta moción é coñecido por todos os que vivimos en Ames, e moi particularmente os que viven no Milladoiro, dando de seguido lectura ao texto da moción.

Intervén a concelleira **Pilar Candocia Pita** durante a lectura da moción, para dicirlle ao alcalde que hai xente abaixo que non a están deixando subir e que non hai razón para que non podan subir xa que ninguén está a alterar nada.

Responde o **alcalde** dicindo: Estou de acordo que non están alterando o funcionamento deste pleno, pero hai un aforo establecido que débese respectar.

Contesta **Pilar Candocia**: Cando lle convén, noutras ocasións, tamén pediu que se deixara estar á xente aínda que había de mais.

Intervén **José Miñones Conde** dicindo: Ese é o problema do que fixo mal no seu momento e agora ten as consecuencias.

Intervén **Pilar Candocia** dicindo: Prégolle que deixe entrar á xente, por favor, deixe entrar á xente. Non hai ningunha razón para que non a deixe entrar.

Intervén o **alcalde** dicindo: Gustarame deixalos entrar pero non pode.

Intervén **Pilar Candocia** dicindo: Queren estar todos, porque queren estar no tema que lles afecta.

Intervén **Olalla Alvite del Río** para preguntar: ¿Canto é o aforo, alcalde?.

Contesta o **alcalde** dicindo: O aforo é en torno ás 40 persoas e se pode incrementar sobre unha porcentaxe pequena, chegando o máximo á 43 ou 45 persoas; que continúe o señor Ramón García Argibay, que estaba expoñendo a moción.

Intervén **Alfonso Rey López** dicindo: Se non os deixa subir eu creo que non debiamos continuar co pleno.

Intervén **Pilar Candocia** preguntando: ¿Queda máis xente abaixo? Déixeos que estean aí na entrada escoitando, que non entren no salón pero abra as portas para que escoiten e así non hai problema de aforo ningún.

Intervén **Ramón García Argibay** dicindo: Isto recorda a vellos tempos, pero vamos a intentar continuar.

Intervén **Pilar Candocia** dicindo: Eu recórdolle cando se foron os seus compañeiros para

Pacto x Ames, e trouxo vostede a toda a súa inchada para que lle dera ánimos, daquela non pasou nada co aforo, e preguntounos se a nós nos molestaba e nós lle dixemos que como sempre, non nos molestaba, porque non nos molestaban daquela os veciños que viñan apoialo á vostede e tampouco nos molestan agora. Esa é a diferenza alcalde, vaia aprendendo.

Intervén **Ramón García** dicindo: O problema é que daqueles polvos veñen estes lodos e a partir de agora créase ese precedente.

Pilar Candocia dirixese ao público dicindo: Alfonso estaba dicindo que nos levantemos e nos vaíamos do pleno se non deixan entrar aos vós compañeiros, pero supoño que o que prima é darlle solución. Entón continuamos.

Intervén **Ramón García** dicindo: Hai temas importantes como o do centro de saúde que deben de ser tratados neste pleno.

Intervén **Pilar Candocia** dicindo: Poden saír e rotar, os da prensa non contan porque nós tampouco contamos.

Intervén o **alcalde** dicindo: Continuamos coa celebración do pleno, ten a palabra Ramón García Argibay.

Continua a súa intervención **Ramón García Argibay**, rematando de dar lectura ao texto da moción presentada.

Intervén, co permiso da presidencia, **Susana Mallo Redondo** para dicir: Eu so tomo a palabra para propoñer unha emenda de engadega, de xeito que se inclúa que se reclame que a autoridade ou administración competente se ocupe do arranxo ou da renovación do teito do centro de saúde, porque se ben é certo que é un parche, é un parche necesario no tempo que nos queda aínda de tramitación para o novo centro de saúde. Intervén **Ramón García Argibay** para dicir: Pola nosa parte non hai problema.

Toma a palabra a **Pilar Candocia**, dicindo: Esta moción trae a colación un tema que estes días está de actualidade nos medios, pero desgraciadamente os veciños do Milladoiro viven esta actualidade dende hai moitísimos anos. Non é ningunha novidade a situación na que se atopa o centro de saúde. Cando eu vivía no Milladoiro, e hai 8 anos que vivo aquí, e levo en total 16 anos, xa o centro tiña pingueiras, xa había problemas con ese tellado, ou sexa que non é nada novo. Non é nada novo tampouco que non saiba o goberno que fixo a Xunta este ano: ¿por que desapareceu a partida que tiña no 2013 este centro médico para O Milladoiro de dous millóns setecentos e pico mil euros, esa era a partida e por que este ano se converteu en 19.500 euros? ¿E que fixo o goberno ao respecto? Iso é o que quixera saber eu, porque aquí se nos vendeu moito no mandato pasado que era moi importante que o goberno do concello fose do mesmo signo que o goberno da Xunta porque iso nos ía a traer moitísimas obras, e mira ti, o que facemos é perder as que están postas. Eu creo, de verdade alcalde, que vostede é mais o delegado do Partido Popular de Galicia en Ames que o representante do goberno de Ames e ese é un gran problema, porque se no partido lle din que cale, vostede cala aínda que saiba que iso é ir en contra dos veciños e veciñas, senón dígame vostede como pode ser que a Xunta non aceptase a emenda que presentou Alternativa Galega de Esquerdas en colaboración con Ames Novo, na que pedían que se retomase de novo esa partida que estaba do 2013 de dous millos setecentos mil euros e a Xunta mirou para outro lado e vostede calou porque lle interesou. Pero mire vostede, a min me da a impresión de que ao Partido Popular xa non lle importa nin que vostede estea aquí de delegado nin outra cousa, porque xa da por perdido este goberno e por iso xa da igual que teñamos un goberno do mesmo color da Xunta ou non o teñamos. O que temos que ter é un Goberno competente, que saiba traballar, que estea á altura e que pense nos veciños e nas veciñas e iso é o que non temos. De nada vale que as siglas sexan iguais ou diferentes, porque con siglas diferentes se conseguiron cousas importantes para este concello e con siglas iguais imos para atrás como acabamos de demostrar.

Vostede lanzou en prensa, en prensa porque en ningún outro organismo mais, salvo a comisión deste pleno porque así foi interpelado polos membros da oposición, que agora hai un suposto terreo que se pode poñer á disposición, e coma sempre volvendo a desvestir un santo para vestir outro. Cando veu aquí o do terreo da Igrexa dixo que agora non había ningún motivo para non ceder o terreo á Igrexa porque non había ningún servizo urxente que necesitara Milladoiro. Unha

vez mais se demostra que iso non e así, que había moitas outras prioridades e a verdade, entre ter un terreo para a Igrexa, tendo en conta que neste momento a parroquia ten un local, non está sen local, entre poñer o terreo a disposición da Igrexa ou para un centro medico, eu creo que a calquera (eu non son católica, pero ese non é o problema), calquera veciño, católico ou non, entende cal é a prioridade.

Nós entendemos que aquí houbo desidia, unha desidia absoluta. Hai tamén un leva e trae, isto por culpa dunha administración e isto culpa doutra, a Xunta di que o ten que facer o concello e o concello di que o ten que facer a Xunta, e mentres a casa sen varrer. O tellado leva así moito tempo, imaxino, eu tamén estiven administrando e non me gusta facer demagogia, e é certo que aínda que lle toque ao concello facer as pequenas reformas ás veces as grandes reformas non as pode asumir o Concello e ten que ser a Xunta que as asuma, se hai que restaurar un tellado completo é lóxico que o restaure a Xunta. Nós non nos vamos a meter nesa lea, que ademais non tería sentido e sería unha demagogia que non serviría para nada. Nós o que queremos saber é que pasos deu vostede. A Xunta aquí ten unha gran responsabilidade porque aínda que sexa verdade que o goberno non foi quen de poñer enriba da mesa un terreo a disposición para facer o centro de saúde, a Xunta ten que garantir que se está a traballar e que os usuarios estean nunhas mínimas condicións razoables para recibir a prestación e para dala, e iso non o está garantindo a Xunta. A Xunta tiña que ou ben esixirlle ao concello aquelas reformas que dependan del ou ben facer ela mesma aquelas reformas mentres non se faga o novo centro de saúde.

Nós metemos esta engádegas que fixo Susana por razóns de que eu estiven na comisión, eu non a podía facer, son estas cousas da administración ridículas pero que son así, fixemos esta engádegas porque por rápido que vaia o proceso todos sabemos que en menos de 2 ou 3 anos nin de broma hai un novo centro de saúde e non pode estar nas condicións nas que está o centro de saúde actual, nin tres meses, nin dous meses, nin un ano.

Quero chamar a atención nunha cuestión: tiveron que vir varias cicloxénese explosivas, todas con nome de muller, iso so é porque as mulleres somos mais solidarias, porque sabedes como é o sistema, que pagan para que leven o seu nome e só as mulleres estamos dispostas a iso. Como dicía, tiveron que vir varias cicloxénese explosivas para que ao final alguén se dera conta da situación na que estaba o centro de saúde do Milladoiro, pero as pingueiras xa estaban cando non había cicloxénese explosivas e unha lámpada que hai alí, que é como para facer unha exposición con ela, de surrealismo, que case ten peixiños dentro, non sei como non rebenta un día. Iso é algo que se ve e me consta que o alcalde foi a visitar o centro medico, por tanto, se non é usuario del, se enterou de en que situación está. Polo tanto, como non pode ser doutra maneira o noso voto a esta moción vai ser favorable.

Intervén co permiso da presidencia **Ramon García Argibay**, que di: A verdade é que o tema do centro de saúde é unha cousa demasiado grave e demasiado importante como para andar con cuestións que poden ter algún tipo de interpretación. A única interpretación que hai é que no ano 2014, cando se fixeron os orzamentos da Xunta de Galicia, a Consellería de Sanidade asignou 19.500 euros para esa partida. O realmente grave, aínda que iso é suficientemente grave, é que desde o goberno do Partido Popular non se fixo nin unha soa alegación, e llo dixemos. Iso é o que nos parece a nós grave. Pero aínda sendo a cuestión así, hai unha cousa que hai que ter en conta: a Consellería de Sanidade ten unha partida xenérica da que se poden facer transferencias de crédito; é dicir, pódense coller eses cartos e destinarse a construír ese centro de saúde. Polo tanto, é o que nós estamos pedindo agora mesmo, que non se espere mais. Nós sabiamos fai moito tempo cal era o estado do centro de saúde, sabiamos perfectamente que a labor de mantemento simple corresponde ao concello, outra cousa distinta é o que esta acontecendo agora coa cuberta e outras cuestións, cousa que tampouco se fixo de forma axeitada. Pero o triste, insisto, é esa cuestión: que dende o goberno municipal non se fixo nin unha soa xestión para que o centro de saúde fora unha realidade. Pero hai unha cousa moitísimo mais grave que é a ocultación de información, algo ao que xa nos ten acostumados este goberno. Esa ocultación de

información consiste, sobre todo, en que nos tivemos que enterar pola prensa que había un problema xurídico na parcela S-15, a parcela orixinaria, cando todos pensabamos que estaba resolto, e non saíu a colación ata que nós sacamos o tema da moción. O triste ademais é que sempre se vai a rebufo. Nós pedimos unha entrevista coa conselleira de Sanidade e aos poucos días se pediu por parte do goberno, cando iso xa tiña que estar feito fai moito tempo. O triste é que hai unha moción presentada polo Partido Popular o 18 de febreiro do 2008 onde se di que o centro de saúde non pode continuar así e para resumir e non cansar moito solicítase á consellería de Sanidade coa máxima urxencia, falamos do 18 febreiro do 2008, a prioridade e comezo dos trámites da construción do novo centro de saúde. O problema é que cando se fai a primeira modificación puntual do Plan Xeral, cando eu estaba de concelleiro de Urbanismo, se fai precisamente para obter unha parcela de 8.000 m² onde poden ubicar, en caso de que non se resolvera o problema xurídico do S-15, o centro de saúde. O caso é que o concello de Ames, como pasa dos 20.000 habitantes, ten a obriga de ter un parque de bombeiros. O caso é que o concello de Ames deu cumprimento a un convenio coa Igrexa onde tiña que cederlle esa parcela porque antes a Igrexa cedeu terreos ao Concello e como compensación, evidentemente, cando un cede uns terreos ao concello e este se compromete por un convenio, no seu momento firmado polo anterior alcalde do Partido Popular o señor Astray, o que fixo foi dar cumprimento a ese convenio, como hai que facer, porque os convenios están para cumprir e non para incumplir. O problema xorde cando despois dese traballo, de facer esa modificación puntual onde hai esa parcela de 8.000 m², nos temos que enterar pola prensa que a outra parcela esta afectada tamén xuridicamente. Non sabemos aínda hoxe cal é o motivo, a pesar de que presentamos un escrito solicitando que se nos aclarara esta cuestión. Evidentemente os escritos que presenta Pacto x Ames nunca teñen resposta, mellor dito case nunca, algúns si teñen resposta, son respostas normalmente de moi pouquiño contido.

Este problema que temos agora mesmo, non agora porque xa ven de moitos anos, agora é o momento de resolvelo, é o momento para que desde o goberno de Ames se inste dunha vez por todas á conselleira de Sanidade a que faga ese centro de saúde. Nos gustaría que nos aclarara dunha vez por todas neste pleno, ben o alcalde ou ben o concelleiro de Urbanismo, por qué está esa parcela sometida a un problema xurídico, que tipo de problema xurídico é. En segundo lugar, cal é o proxecto, se é que hai un proxecto de centro de saúde para o Milladoiro, e se ese proxecto está adecuado e é axeitado para esa posible parcela, ben sexa no S-15 ou no S-16. Todas estas cuestións nos gustaría que quedaran resoltas neste pleno, aínda que me temo que non van a quedar resoltas, pero nos gustaría que fora así.

Eu creo que hai que ter as cousas moi claras. Primeiro, as reparacións normais que se fan no centro de saúde do Milladoiro, porque o de Bertamiráns está cedido á consellería e é competencia súa 100%. Corresponde ao concello e o mantemento diario, para entendernos, teno que facer o Concello. Sen embargo, a obra maior da reparación da cuberta e outras cuestións, lle corresponden á consellería de Sanidade. Pero é moi importante deixar claro que os veciños do Milladoiro non se poden quedar satisfeitos simplemente co compromiso desa reparación. O que temos que procurar xa desde este momento é que haxa un compromiso de construción do centro novo de saúde. Iso é o que solicitamos e pedimos. De momento nada máis, moitas grazas.

Intervén, co permiso da presidencia, **José Manuel Miñones Conde**, que di: Realmente isto non é algo novo. Intervindo en terceiro lugar moitas das cousas xa se faloron e xa se dixeron aquí, pero hai que facer fincapé en moitas destas cousas. Dende o ano 2006 que se fala, 2003 en que comeza todo o proceso, pasan moitos anos e se falou moitas veces neste mesmo salón de plenos sobre este asunto. Dende logo se conseguiron cousas, conseguiuase por exemplo que se incluíra o centro de saúde do Milladoiro dentro dos 16 centros que ía construír a Xunta de Galicia como prioritarios. Consequiuse un anteproxecto que existe para este centro de saúde, conseguiuase un orzamento de 2,1 millóns de euros para facer este centro de saúde. O problema loxicamente estivo no contencioso que estivo aberto para o S-15 e que a día de hoxe segue cun novo contencioso aberto e polo tanto con problemas xurídicos. Esa é a realidade e ese é o problema. A Xunta retira dos orzamentos esa partida para este centro de saúde pero como ben se dixo non é o problema real que ten este centro de saúde, porque se pode facer transferencia de crédito doutras partidas e facer esta dotación que é mais que necesaria.

Outra cousa da que podemos falar aquí con mais detalle é das formas deste goberno e deste

alcalde, unha vez mais, é dicir, non é algo novo. Seguimos falando e seguimos gobernando de espaldas á Corporación, como agora se está a demostrar e de espaldas á cidadanía como hoxe mesmo acaba de demostrar. Vemos unha detrás doutra, que vostede a pesar de estar en minoría segue ser ver que está en minoría e unha vez tras outra trae cousas e trae alternativas que fai a través da prensa e nunca por medio desta Corporación, que é quen se debería enterar primeiro. Vostede ocultou información unha vez mais, vostede ocultou unha información importantísima como coñecer que dende xuño de 2013, é dicir, hai 8 meses, vostede sabe que existe un contencioso sobre esa parcela e non se dignou a dicir nada a esta Corporación, a ningún membro desta Corporación, o cal está no seu dereito, non é unha obriga, vostede non está obrigado a comunicar esa información, pero sendo minoría como é e sabendo como sabe que terá a necesidade, no seu día, de que a proposta á Xunta sexa aprobada por esta Corporación, o mínimo sería ter feito esa comunicación. ¿Por que? Non o sabemos, eu preguntelle na comisión porque non se dixo nada dende xuño 2013 de que existía este proceso, non, o fai a través da prensa unha vez mais para dar o titular e facer a foto coa conselleira de turno. Vostede nestes 8 meses non buscou nin unha soa solución, non fixo nada, é dicir, é evidente que non moveu nin un só dedo en conseguir que se fixera algo con referencia a esa parcela ou para o centro de saúde, para dar algún tipo de alternativa. Ten que vir unha moción dos compañeiros de Pacto x Ames para que vostede reaccione e reacciona a base de nota de prensa: hai nota de prensa entón eu fágoo. Pois aquí acontece o mesmo: presentan unha moción sobre o centro de saúde e vostede non tarda nin 4 días en chamar á conselleira, en sacarse a foto coa conselleira e en facer unha proposta improvisada, unha proposta que é un cambio de cromos, cambiamos a parcela do parque de bombeiros polo centro de saúde. Pero vostede non está en condicións de facer esa oferta; vostede aínda que sexa alcalde, non está agora mesmo en condicións de facer esa oferta porque vostede depende desta Corporación, porque esa parcela que ten cedida o concello á Xunta para o parque de bombeiros, se quere vostede cambiala para centro de saúde, ten que vir ao pleno e ser devolta e ser aceptada por esta Corporación, na que vostede é minoría. ¿E que acontece se esta Corporación vota en contra? ¿Que pasaría se votásemos en contra de cambiar? ¿Con que xoga vostede? Unha vez mais xoga con poñer á oposición entre a espada e a parede, porque nós temos a responsabilidade que vostede non ten. Eu preguntelle na comisión que plan tiña para o parque de bombeiros porque se vostede está aceptando ceder a parcela do parque de bombeiros, será que renuncia ao parque de bombeiros. E a súa contestación, que está recollida en acta, di *“que se dende o 2008 non se comunicou nada oficialmente dende a Xunta entende que non hai interese”*. Dende logo por parte de vostede tampouco. Isto ven dende o 2008 e vostede está dende o 2011 ¿fixo algunha iniciativa para pedir ese parque de bombeiros? Como aquí nos enteramos a través da prensa, hai que preguntarlle directamente. ¿Sabe algo que nós non saibamos sobre ese parque bombeiros? ¿Hai intención de facer ese parque de bombeiros? Porque o que é evidente é que é necesario ese parque de bombeiros, non só necesario, obrigatorio. Despois vostede recorre ao convenio que ten asinado o concello de Ames co concello de Brión para cubrir os servizos de emerxencia e incendios, a sabendas que non serve ese convenio, que é un simple parche a un problema que temos. Ames é un concello de 30.000 habitantes, ademais en Milladoiro hai edificios de 7 plantas, aos que non poden chegar as unidades de Brión e hai que recorrer ao parque de bombeiros de Santiago.

Nós non priorizamos unha obra sobre a outra, nós buscamos alternativas, pero dende o goberno non buscou alternativa durante 8 meses. Por iso lle preguntabamos que fixo vostede durante estes 8 meses, ¿pensou algo? Tamén nos di cando lle preguntamos na comisión que fixeron vostedes, di que comunicaron á Xunta de Galicia a aprobación do plan do S-15 que foi en abril. No pleno de abril se aprobou o plan S-15 e se comunicou á Xunta de Galicia a interposición dun contencioso, é dicir, á Xunta si que lle notificou, a esta Corporación non, pero á Xunta si que lle dixo en xuño que había un contencioso novamente. Tamén dixo que viñeron ao Concello representantes da consellería, non sabemos quenes, nin cando, nin por que, eu preguntelle se había algún un documento oficial e dixo vostede que non, que foi unha chamada, *falamos e viñeron*, e non hai foto, estráñame moitísimo que non houbera unha foto sobre esa reunión. Trasládouse á Xunta o interese do Concello en

buscar unha solución, ¿cal? ¿Que solución deu vostede alá polo mes de xuño? Se trasladou á Xunta pero non tiveron unha resposta oficial deste asunto. E acabouse o tema, a calada por resposta. Claro, a resposta probablemente a Xunta si que a deu, a deu cos orzamentos. Cando viu vostede que en xaneiro nos orzamentos retiran a partida para o centro de saúde do Milladoiro ¿que fai? Cala. Vostede non fixo, como dicía o señor Argibay, nin unha soa emenda. Nós si, nós fomos e presentamos unha emenda parlamentaria a través dos compañeiros do Parlamento, unha emenda onde pediamos a escola infantil para Bertamiráns e o centro de saúde do Milladoiro, que se incluíran outra vez estes dous millóns setecentos mil euros para o centro de saúde do Milladoiro. Si que o fixemos. ¿Saben que fixo o Partido Popular na Xunta? Votar en contra. ¿E vostede que fixo? Calar outra vez mais, non é a primeira vez que cala ante o seu mandato maior.

Esa é a realidade do que temos neste Concello e a realidade sobre o centro de saúde que é algo necesario, estamo de acordo ¿Alternativas? Nós xa fixemos unha na comisión; en 24 horas este grupo foi quen de pensar nalgún tipo de solución, non sei se viable ou non, haberá que sentarse e haberá que falar cos técnicos, esa é a misión que ten vostede como goberno. Nós precisamente o que dixemos foi que se hai unha parcela de 8.200 m² na que vai o parque de bombeiros, ¿por que non vai aí o centro de saúde tamén? Está desafectada para ceder á Igrexa, un acordo que nós votamos a favor, como dicía o señor Argibay era o que se tiña que facer por ese acordo que se tiña anteriormente. Deses 2.000 m² que se van a ceder á Igrexa, ¿por que non se busca outra parcela no Milladoiro que se poda ceder para á Igrexa e que permita ter todas as infraestruturas que necesita este concello? Porque é necesario o parque de bombeiros, porque é necesario o centro de saúde e porque son necesarios os terreos para cederlle á Igrexa. ¿Non existen outras parcelas? Porque ata onde nós chegamos existe no APRM7, sen ir mais lonxe, 2.000 m² de dotacións, alí podería ir. Incluso hai outro mais cercano ao centro do Milladoiro, na esquina na parte de arriba, que son 1.200 m², habería que falar ca igrexa se lle serve esa parcela, probablemente estando mais cerca sexa mais apetecible. Non o sei, pero esas son solucións que debería vostede traer a este pleno xa hai 8 meses, non nós dende a oposición. Con iso conseguiría a parcela para o centro de saúde, para o parque de bombeiros e se seguiría cumprindo o acordo coa Igrexa e ademais inclusive ao mellor mais cerca a igrexa, xa que como dicían os de JUPEMI estaba moi lonxe onde a ía a construír, así estaría mais cerca, no centro do Milladoiro.

Existen moitas solucións, inclusive pensando un pouquiño mais chegamos a pensar se o parque de bombeiros podería vir aquí a Bertamiráns na parcela que queda libre da escola infantil. ¿Podería conseguirse o parque de bombeiros aquí e deixar aquela dotación toda para o centro saúde? ¿E por que non? Ao mellor non se pode. Outros pensarán que cando o S-15 se resolva legalmente, se pode meter alí o parque de bombeiros. Non, non se poderá meter no medio do Milladoiro o parque de bombeiros ou vai onde está ou non vai. ¿Pero por que renunciar a unha cousa por outra? ¿Imos a seguir facendo un convenio por 20 anos con Brión cando este concello está crescendo e é o concello mais xoven de Galicia? ¿Esa é a súa solución a todo este problema? É mais, cando un vai á paxina web da que xa levamos falado nos últimos plenos e lee que *na reunión o alcalde de Ames e a conselleira tamén analizaron a situación xurídica creada a partir dun novo contencioso*, eu crin que xa o falaran alá polo mes de xuño, como dicía na comisión, pero se ve que o falaron agora, e *planteoulle á Rocío Mosquera a existencia de outra parcela cedida xa no seu día á Xunta para ubicación do parque de bombeiros e que se podería destinar como alternativa. Finalmente acordaron continuar en contacto.* ¡Fume! Acordos, solucións e alternativas é o que pide e iso é o que pedimos nós dende aquí. Dende logo aí ten unha serie de propostas, probablemente teñamos que estudalas, máis ben teñan que estudalas, pero as ten, para que despois non diga que só criticamos e non facemos propostas, aí ten unhas cantas, estúdeas a ver se é posible e se non é posible informe. A Deus grazas, agora temos unha moción na que no último punto di que ten vostede que informar de todos e cantos trámites se van a facer. Veremos se se cumpre, porque temos a experiencia de mocións nas que despois non se cumpre o acordado. Polo momento nada mais.

Intervén o **alcalde** dicindo: A realidade do centro de saúde do Milladoiro que temos actualmente, creo que a ninguén se lle escapa que é un centro deficitario para a poboación do Milladoiro. Xa dixo dona Pilar que fai 8 anos o centro xa presentaba problemas. ¿E que se fixo? ¿Que fixeron? Se fixeron parches durante moitos anos. O Concello levou a cabo o mantemento do centro de saúde de Milladoiro como veu facendo nos últimos anos, dunha maneira ao mellor algunha vez

mais acertada e outra vez menos acertada, que puxo a descuberto unha carencia que xa era coñecida por todos que era o tellado ou a cuberta do centro de saúde do Milladoiro. O fácil agora é botar balóns fora, responsabilizar ao goberno de turno, que ten a súa responsabilidade obviamente, pero eu creo todos temos responsabilidade no problema que agora mesmo temos enriba da mesa por que non é un problema, como se dixo antes, que viñera cos últimos temporais que tivemos en Ames, é un problema que ven de tempo atrás.

No ano 2008 o centro de saúde do Milladoiro quedaba pequeno para as consultas pediátricas, acórdome eu e moitos dos que estamos aquí nos acordaremos que naquel momento se cedeu o local municipal que estaba a carón do centro de saúde para ampliar os servizos de pediatría e outros servizos do centro de saúde. Foi outro parche mais que puxemos no ano 2008. Con posterioridade, o Concello cedeu unha parcela no S-15, ese terreo que está entre o centro de saúde e a casa da cultura do Milladoiro, un terreo que estaba dentro dun desenvolvemento urbanístico que estaba pendente dunha sentenza xudicial, xa saíra unha sentenza e estaba recorrida e volveuse a confirmar a anulación dese plan. Aínda así, aínda a pesares do procedemento xudicial e coa inseguridade que poda haber, aínda así se cedeu esa parcela no ano 2008 independentemente de que había outras parcelas no Milladoiro, cedeuse esa con esa problemática coñecida. Ata o mes de maio, no que o Concello volve a aprobar un novo plan no S-15 non se volveu a ter a seguridade xurídica para poder ofertar esa parcela novamente ao Sergas. Seguridade xurídica que volve a quedar no aire cando un particular, que xa recorrera contra ese plan urbanístico, volve outra vez a acudir á xustiza porque entendía que os seus dereitos como herdeiro non estaban suficientemente defendidos ou aclarados con ese novo plan que se presentaba. Dese novo contencioso figura a personación. Cando entra un contencioso no Concello a través dun decreto se nomea avogado e se fai constar o número de procedemento e quen é o que presenta ese procedemento. Esa información está nos decretos e esa información se pode ampliar. Obviamente, os concelleiros teñen acceso aos decretos antes da convocatoria do pleno e poden pedir mais información. A información non se oculta, así como se pregunta por outros decretos, para estes decretos de personación nun procedemento xudicial tamén se pode preguntar. A min o que me gustaría saber foi por que no ano 2008 non se cedeu outra parcela que non tivera ningún problema xudicial, gustárame sabelo, se pensou que naquel momento era a mais idónea pero había un proceso xudicial enriba da mesa que xa pintaba mal naquel momento para o Concello. Dende o mes de maio se lle comunicou ao Sergas a dispoñibilidade do terreo, se comunicou a problemática que volveu a xurdir, se tiveron reunións para ver as opcións que podían albergar un novo centro de saúde e planteouse recentemente utilizar a parcela de 4.699 metros que no ano 2008 se acordou coa Xunta de Galicia, naquel momento socialista, aportar para resolver o problema que había coa comarcalización do parque de bombeiros de Santiago que a través doutra sentenza anulaba a comarcalización, debido a que naquel momento o goberno de Santiago de Compostela non chegara a un acordo cos traballadores do corpo de bombeiros, e tumbaba a posibilidade de que os bombeiros de Santiago puidesen formar parte dese parque comarcal. Vostede fala de que temos un acordo con Brión, efectivamente se estableceu un acordo de colaboración para a prestación de servizos de emerxencias e protección civil, un acordo que tivo vixencia do 1 xaneiro de 2013 ata agosto de 2013 e que a posteriori, a través dun acordo entre a Xunta de Galicia, as catro deputacións provinciais e a FEGAMP crea os grupos de emerxencias supramunicipais. Ames está dentro do grupo de emerxencias con Brión, un grupo de emerxencias que ten unha permanencia no tempo do ano 2013, 2014 e 2015, a través dunha fórmula que establece que o concello de Ames forma parte dese servizo de emerxencias e agora mesmo temos a cobertura a través de ese grupo de emerxencias supramunicipais, de emerxencias e de protección civil, é dicir, non estamos desasistidos. Obviamente, se hai algún tipo de actuación a maiores que conleve mobilizar outros medios, normalmente se acode a outros medios como podía ser o parque de bombeiros de Santiago. O que lle podo dicir é que no seu momento había outras parcelas que podían albergar menos problemas xurídicos, se cedeu aquela e imos carrexando problemas xurídicos con esa parcela. E nesta primeira intervención nada mais.

Toma a palabra a **Pilar Candocia Pita**, que di: Eu non sei se se escoitou, pero como esta gravado lle recomendo que o poña. Ademais hai por aí asistentes para escoitar e ver se se fixo ben ou mal. De verdade alcalde, vostede non pode dicir o que dixo aquí e quedarse así tan tranquilo!. En primeiro lugar, eu creo que fun a única que fixen referencia aos temporais e dixeran que tiveron que ser os temporais os que puxeron o tema nos medios, non os que nos chaman a atención de que o centro esta mal, porque iso claro que o sabiamos todos. E disto último que acaba de dicir, eu estou moi sorprendida; no 2008, que eu non estaba na Corporación, pero non hai problema, di que había outros solares que se podían poñer a disposición no Milladoiro, ¿entón naceron solares no Milladoiro ? Porque que eu saiba O Milladoiro sempre foi deficitario en infraestruturas e que eu saiba había menos aínda dos que hai agora porque tivo que facerse algunha operación urbanística para sacar algunhas partes do parque central e convertelas en dotacional e por iso se conseguiu o do parque de bombeiros, tiveron que facer unha modificación. O alcalde acaba de dicir ao final da súa intervención que naquel momento había outros terreos a disposición e eu digo que a día de hoxe hai mais a disposición porque efectivamente se traballou o plan e se conseguiron algúns terreos, como o terreo para o colexio , que a ver se ao final vai, que aínda non esta aprobado, pero digamos que está aberto o trámite, e outros, pero que eu saiba hai mais agora dos que había naquel momento. Por iso lle digo que se escoite. Fixo vostede unha intervención coa que non nos dixo nada, eu non sei se é para cansar á xente que está aquí esperando por outro tema, pero non se van cansar porque levan moitos anos loitando por iso e agora lles da igual media hora mais que media hora menos. Ademais cónstame que este tema tamén é do seu interese, porque a maioría son veciños do Milladoiro e polo tanto non vamos a pasar de puntillas, non crea que por iso vamos a pasar de puntillas por este tema. Sobre unha cuestión que dixo vostede é certo que o feito de que estea a partida aberta con 19.000 euros posibilita que se o goberno galego ten vontade, poda traer diñeiro dunha partida por outra. Iso na teoría é correcto. Na práctica non hai nin un só centro de saúde que se fixera nesas condicións. Soamente quedará o que sempre lle quedou ao Milladoiro ou a Ames que é saír á rúa como están saíndo os veciños para conseguir que iso se poda modificar. Como moi ben dixo Miñones, houbo dúas forzas políticas que presentaron emenda, non a presentou o goberno pero si dúas forzas políticas: o Partido Socialista de Ames a través do grupo socialista e Ames Novo a través de Alternativa Galega de Esquerda e a Xunta dixo que non ás dúas emendas, taxativamente que non. Iso non quere dicir que non cambie, sobre todo en época preelectoral e se os veciños preman. A min cando vostede esta falando e tamén o señor Miñones asáltame unha dúbida. Vostede se deu moita presa para resolver o da Igrexa, porque tiñamos unha débeda terrible e había que cumprir ese convenio por enriba de todo, parece que o resto das cousas non teñen a mesma importancia. Mire vostede, eu non teño ningún problema en que se cumpra o convenio coa Igrexa porque efectivamente estamos obrigados a cumprilo, pero que se faga con racionalidade, que se pense primeiro en todos os locais que temos e onde colocamos cada cousa e que se faga tamén cun orde de prioridades, porque a min dicirme que a xente de JUPEMI está preocupada porque a igrexa lles vai a quedar lonxe. ¡Pois non lle digo nada de como lles vai quedar o centro de saúde! A xente de JUPEMI terá que estar preocupada tamén polo centro de saúde, case mais que pola igrexa, porque á igrexa iran unha vez á semana ou algo mais, pero ao centro de saúde ao mellor teñen que ir bastante mais. Por iso lle digo que nós creemos que hai que facer as cousas ben feitas e paga a pena pararse dous minutos e non resolver solo sacando fotos coa conselleira. Párese dous minutos e fale cos veciños, convoque ás entidades. Se tivera vostede aprobado un regulamento de participación e houbera un consello de participación, agora xa tiña interlocutores cos que falar, e agora non os ten porque non quixo facer ese traballo que vimos perdendo dende o día da constitución deste mandato. O que lle pido é que ás entidades que hai neste momento, todas as que hai: JUPEMI, a parroquia, ANPAS de todos os coles, as entidades culturais que haxa, convoque a todas. Nós xa o vamos facer e o estamos facendo: convoque a todas para explicarlles cal é a situación e que elas tamén teñan capacidade de decisión sobre onde vai o centro de saúde, porque temos que ser todos corresponsables da decisión que se tome. Tamén hai que saber canto tempo se prevé que vai a durar ese contencioso que esta aberto, porque a cidadanía ten dereito a decidir o seu futuro con responsabilidade e con toda a información sobre a mesa; teñen que saber se prefiren agardar un ano ou dous para que o centro de saúde estea enclavado no centro do núcleo ou estar dispostos que vaia por detrás do instituto á altura do polígono, polo que eu teño entendido en liña recta á altura da gasoleira, mais ou menos, en calquera caso bastante lonxe. Os cidadáns tamén teñen dereito a decidir se prefiren

agardar un pouco e que ubicación sexa mais céntrica ou non. E vostede ten a responsabilidade de convocalos, está no goberno para facer esa consulta, esa si que é unha consulta urxente e estamos falando do dereito a decidir, que parece que é a última moda agora. Xa non é a decisión que se tome, a min me da igual se os veciños do Milladoiro consideran que é mellor a prontitude e que estea aí dentro dun ano ou esperar dous anos e que estea noutro lado. Se eles consideran que é mellor a min váleme esa decisión, pero o dereito a decidir ten que ser algo fundamental, como o dereito a decidir das familias a xornada, o dereito a decidir das mulleres e moitos mais. Trátase de buscar solucións. Esta moción se vai aprobar, iso está claro, pero temos a experiencia de que mocións que se aproban despois non se levan a cabo e perdemos absolutamente o control delas porque sempre facultamos ao alcalde para facer todos os trámites precisos que conleva a moción. Por iso eu propoño, Ramón, se é posible que ademais de facultar ao alcalde se faculte unha comisión xunto coo alcalde, con mais persoas deste pleno, síntoo, pero teño motivos para non fiarme. Non me refiro a crear unha comisión, senón que cando o alcalde teña que facer estas xestións, teña que chamar a dous ou tres concelleiros mais, a min me da igual quen sexa, non teño que ser eu nin sequera ninguén deste grupo é simplemente garantir que se vai a cumprir porque senón vamos a volver a estar nas mesmas e moi probablemente se volva a incumplir como noutras moitas mocións que se aprobaron aquí. Non é nada mais que iso, non é crear unha comisión; simplemente, en vez de facultar ao alcalde que se faculte ao alcalde, ao señor Miñones e a María, por exemplo. Déixoo no aire, se o consideras oportuno se presenta como emenda *in voce*, aínda que eu non poda porque estaba na comisión pero farao outro. Nada mais, so anunciar o noso voto favorable.

Intervén, co permiso da presidencia, **Ramón García Argibay**, que di: A verdade é que o que se escoita neste pleno non ten límites. Non se contestou nin unha soa das preguntas que se fixeron e ademais dicir que se actúa con transparencia. Temos moitos escritos que presentamos dende hai mais dun ano, pero teño aquí os últimos. O 10 de febreiro de 2014 solicitamos acceso e copia de todos os informes de Intervención e Tesouraría emitidos dende a data de aprobación do Plan de Axuste, se fora posible en forma dixital, acceso e copia dos informes de reparo e desconformidade emitidos por Intervención, acceso e copia dos levantamentos de reparo realizados pola Alcaldía. Dende o 10 de febreiro sen contestar. O 13 de febreiro solicitamos acceso e copia da relación de facturas da Sociedade Estatal Correos e Telégrafos S.A. correspondentes aos anos 2011, 2012 e 2013. Dende o 13 de febreiro sen contestar. O 20 febreiro solicitamos acceso e copia dos recursos presentados que afectan aos sectores S-14, S-15 e S-16, é dicir, os sectores onde teoricamente vai a ir o centro de saúde, acceso e copia a todos os escritos presentados a partir da aprobación dos sectores, acceso e copia dos escritos de contestación e notificación deses posibles recursos. Tamén temos preguntas, que facemos un lote delas. Non se contesta absolutamente nada. É mais, se está vulnerando a lexislación continuamente, se está provocando ou se quere provocar, esa é a intención que nós cremos que ten este goberno, que desde Pacto x Ames se presente unha denuncia por dereitos fundamentais. ¿Para que? Para dar a sensación que quere o goberno sempre, que estamos enfadados. Non señor, nós estamos facendo o que temos que facer, que é interesarnos polo centro de saúde igual que nos interesamos por outras cuestións como as que acabamos de expoñer. Pero ademais non dou crédito ao que escoito. Se fala do 2008, ¿levamos dende o 2008 esperando polo centro de saúde? Non, levamos dende o 2003 esperando polo centro de saúde. Evidentemente a xestión que fixo o partido socialista no *Milladoiro que está por ver*, foi un desastre, porque non se fixo planeamento, non se fixo xestión urbanística ningunha. Tiñamos un Plan Xeral que no seu momento se aprobou e se deixou que corra o plan xeral sen facer absolutamente nada. Cando nós gañamos as eleccións, antes da ruptura, tiñamos moi claro que no Milladoiro, ademais era un compromiso noso, había que facer xestión de planeamento, é dicir, eramos conscientes de que as parcelas que había alí eran moi escasas, e que as poucas que había estaban afectadas por un problema xurídico, que no seu momento foi motivado por unha decisión do partido socialista sen precedentes. Chegamos ao goberno e o primeiro que fixemos ,neste caso era a miña responsabilidade como concelleiro de Urbanismo, foi modificar o Plan Xeral, a primeira modificación, e con

esa modificación obtivemos 8.000 m² sen renunciar nin a un só metro cadrado de zona verde. Pero non só iso, cando chegamos tamén ubicamos os terreos da escola infantil de Bertamiráns, en vez de ao lado da Casa da Cultura, onde estaba totalmente encaixonada, ao outro lado do paseo fluvial do Bertamiráns, porque sabiamos que unha futura escola infantil tiña que ter uns terreos xenerosos, tanto que sobran en torno aos 2.000 metros, que hai que pensar que se vai a facer con eles, pero están aí; fíxose xestión urbanística, fíxose xestión do planeamento. E dende que nós marchamos do goberno non se volveu a facer un ápice de xestión nin de planeamento, nin urbanística nin absolutamente nada de nada. Pero ademais se din cousas que evidentemente non teñen sentido ningún. Por exemplo, cando se fala da comarcalización do parque de bombeiros, o concello de Ames ten mais de 20.000 habitantes e segundo a lexislación vixente, a Lei de bases do réxime local di que eses concellos teñen que ter un parque de bombeiros propio, e non o temos. No seu momento o partido socialista tivo unha iniciativa de ubicar o parque comarcal nunha parcela no Milladoiro, non había problema ningún, entre comiñas, pero empezaba daquela a crise e se empezaba a falar de austeridade, ¿e qué se dixo? Nós presentamos unha moción daquela, ¿qué se dixo? Que se hai un acordo na comarcalización dos bombeiros preferimos esa opción que estar pagando aos bombeiros de Santiago, aos bombeiros de Ames e aos bombeiros de Brión; a mellor opción era a comarcalización. Ao final, nin o partido socialista resolveu o tema e agora se está deixando tamén o tema sen resolver, porque agora ninguén está en condicións de dicirnos que vai a pasar coa comarcalización do parque de bombeiros, se queda ou non queda e que vai a pasar co servizo de Brión que non da servizo ao Milladoiro, que non hai que esquecerlo. ¿Como funcionan as chamadas de emerxencia cando se producen no Milladoiro sobre todo? Chaman ao 112 ou ao servizo de emerxencias necesario e o primeiro que fai é chamar ao de Brión, independentemente de que o edificio teña 7 plantas, 5 ou 1, iso non é así, porque sabe perfectamente que o servizo de Brión non da servizo necesario ás vivendas que hai no Milladoiro, sobre todo aos edificios que teñen altura. Polo tanto, non se está a afrontar o problema. Moitas veces cando falamos destas cuestións a min non me gusta politizar, pero estas cousas hai que dicilas, non podemos esquecerlas; non podemos esquecer que o anterior goberno socialista non fixo planeamento urbanístico no Milladoiro, pero tampouco podemos esquecer que a partir de agora, que si hai parcelas dispoñibles e ademais que se fixo planificación urbanística e se fixeron dúas modificacións puntuais: unha nesa zona e outra indo para Ventín a carón de Mobles Compostela, onde hai unha parcela de mais de vinte mil metros cadrados xa en condicións de cedela ou de poñela a disposición para facer o novo colexio de infantil e primaria do Milladoiro. Polo tanto, si se fixo xestión e planeamento, claro que fai un ano que non se toca iso, pero ao mellor a algúns membros do goberno lles preguntamos que é o S-15 e pensan que é unha letra e un número, ese é o grave problema deste goberno. Mire, vostede ten que contestar claramente, neste pleno, primeiro: ¿hai proxecto do centro de saúde? ¿Si ou non? Segundo: ¿hai compromiso da conselleira? Vostede se reuniu con ela a *rebufo*, despois de que nós lle pediramos a entrevista, evidentemente sabiamos que non nos ían a recibir, iso tiñámolo moi claro, pero polo menos forzar ao goberno ao que o faga, xa que non o fai de *motu proprio*, forzalo. ¿Hai compromiso da conselleira de Sanidade de facer este ano, se se pon a parcela a disposición, o centro de saúde? ¿Si ou non? É tan fácil como dicir iso. ¿Hai parcela no Milladoiro suficiente para ubicar ese centro de saúde? Porque non sabemos que tipo de centro de saúde, así como a escola infantil si sabemos que é de tres unidades, o centro de saúde non sabemos, o descoñecemos totalmente, e iso é unha labor que ten que facer o goberno. Por iso eu non estou de acordo neste caso con dona Pilar, de facer esa vixilancia como se fora un neno pequeno a ver se fai os deberes ou non os fai. O alcalde ten que facer os deberes, punto e pelota. Eu enténdoa dona Pilar, non é unha crítica cara a vostede, enténdoa perfectamente porque nos vemos moitas veces nesa situación de vixilancia continua para ver se se fan os deberes ou non. Igual que no tema do regulamento que dicía dona Pilar: nós presentamos un regulamento xa fai un mes ou mes e pico, pero é igual, aínda que non se presentara, a misión do goberno é facelo. De todos os xeitos, eu creo que o tema do centro de saúde, igual que o da escola infantil e que o tema de Ventín, son suficientemente serios como para non politizalos, non hai que politizalos. Aquí temos un obxectivo todos, que é conseguir o centro de saúde do Milladoiro, conseguir a escola infantil de Bertamiráns, conseguir o colexio de educación infantil e primaria do Milladoiro, conseguir a xornada para o colexio de Ventín, iso é o obxectivo que temos, porque aquí non hai ideoloxía, aquí hai feitos. Nos atopamos cun muro, que é o goberno que non actúa, está en parálise, non traballa e ademais non ten intención de facelo porque non o demostran, esa é a verdadeira clave. Polo tanto, conteste por

favor vostede a esas preguntas. Xa que non as contestou por escrito, que tiña a obriga de facelo, e tiña que traelas a este pleno, conteste por favor neste pleno e deixe claro cal é a posición do goberno. O da transferencia de crédito se fai continuamente, transferencias de crédito se fan no Concello, se fan na administración autonómica e se fan na administración do estado. Polo tanto, problema ningún, simplemente hai que ter vontade, nada mais, vontade. E claro, ¿quen ten que poder forza esa vontade? O que está gobernado, nin mais nin menos, a cuestión é así.

Intervén **Pilar Candocia** dicindo: Pero o que está gobernando non o vai a facer.

Continúa **Ramón García Argibay**: Bueno, pero a nosa misión é dicir que si, que o ten que facer. Por tanto, eu creo que non estamos en condicións nin de renunciar ao centro de saúde, nin de renunciar ao parque de bombeiros, nin de renunciar ao terreo da igrexa, porque se pode. Outra cousa é que fora excluínte pero non é excluínte, é complementario, van de feito paralelos. E se hai que facer mais planeamento urbanístico hai que facelo, nin mais, nin menos. En canto ao que se falou aquí de que o centro de saúde pode quedar lonxe, todo é relativo. O certo é que levamos esperando anos polo centro de saúde, polo menos 11 anos, e eu creo que é o momento. Ao mellor paga a pena que estea un pouquiño mais arriba e non esperar por unha parcela que no seu momento sabiamos todos e se dixo neste pleno, díxeno eu porque era un tema que levaba eu, que sabiamos perfectamente que xa estaba afectada. Cando se aprobou de segunda vez o planeamento, xa con nós no departamento de Urbanismo, a parcela quedou limpa e xa non había problemas xurídicos, ata que en xuño apareceu o que apareceu. Dicir que figura nun decreto, home si, pero ¿saben como figura nos decretos? Toma de razón de sentenza número tal, e tomas de razón de sentenzas hai non sei cantas, hai centos probablemente e se non nos contestan a escritos tan sinxelos como os que presentamos cada mes, que non se contesta practicamente ningún, se andamos a pedir explicacións de todas as sentenzas que hai neste Concello, que son moitas, a favor ou en contra, ao final non só iso, senón que paralizamos o funcionamento do posible goberno, porque temos dúbidas de que funcione. Polo tanto, o normal cando é unha cuestión tan clara, tan evidente, tan importante, tan necesaria como o centro de saúde, como a escola infantil, etc, o normal é que se trate na comisión. A Xunta de Voceiros non se reúne nunca, debe ser o único concello de España que non reúne a Xunta de Voceiros, aquí como Juan Palomo, *"yo me lo guiso, yo me lo como"*. Despois chegamos á situación na que estamos, e logo utilizarán iso de que estamos enfadados, non estamos enfadados, para nada, tomamos a decisión que tomamos no seu momento e a xente está vendo porque tomamos esa decisión, porque o tempo ao final pon a cada un no seu sitio; porque nós non estabamos dispostos a estar sumisos como está este goberno a todas as decisións. Eu recordo que hai moitos alcaldes doutros concellos do Partido Popular que lle tiran das orellas aos conselleiros e non pasa absolutamente nada, e non lles crecen as orellas e conseguen cousas. Hoxe vai a a vir aquí unha moción presentada polo Partido Socialista, e o alcalde da Estrada, do Partido Popular, foi quen levou esa moción, non só a votou a favor, senón que foi quen a levou, con certos matices é unha cuestión similar. Polo tanto, o alcalde independentemente da cor política que sexa, o que ten que facer é mirar polos intereses dos veciños e nada mais, e encabezar as reivindicacións, sempre e cando sexan reivindicacións interesantes, razoables, necesarias, imprescindibles, etc. Polo tanto, por favor, contésteme claramente a esas preguntas. Solo lle pido solo iso, un si ou un non. Nada mais.

Intervén, co permiso da presidencia, **José Miñones Conde**, que di: Vou intentar ser o mais breve posible, porque a verdade é que cada vez que vexo o cartel levantado a aquela persoa, non sei como non ten o brazo durmido. A verdade é que son moitas as cousas que saen e nos gustaría entrar no debate e o vou a intentar facer o mais rápido posible. En primeiro lugar, para dar contestación ao señor Argibay que di que non quere politizar; da xestión urbanística solo vou a dar unha serie de datos: campo de fútbol, cuartel da Garda Civil, escola infantil, instituto, e podería seguir con outros. É mais: a parcela da que fala vostede, desa reparcelación do S-14 e do S-16, xa lle dixen nun pleno e voullo repetir que é unha parcela que xa estaba proxectada polo goberno socialista, é mais, saía no documento

do *Milladoiro que está por ver*, é mais, esa parcela era a destinada para o instituto de Milladoiro. Ao final coa Xunta se conseguiu o compromiso e se puxeron outros terreos e finalmente nesa parcela non se fixo a modificación puntal.

Intervén **Ramón García Argibay** para dicir: Estaban xa no Plan Xeral aprobado no 2002, non fixeron vostedes xestión nin planeamento, o que pasa é que o Plan Xeral se esgotou e houbo que modificalo, igual que había que revisalo agora e este goberno non quixo revisalo. Desculpe, pero non podía deixar pasar isto.

Continua **José Miñones** dicindo: E no referente ao que fala da escola infantil de Bertamiráns, nós propuxemos a única parcela viable e a única que existía daquela, era esa. É mais, vostedes, recordo que traían ou fan traer outra alternativa que non foron quen de traer, porque non había outra parcela, solo existía aquela parcela. ¿Que non era a mellor? Totalmente de acordo. ¿Vostedes que fixeron? Tiveron a sorte de que cando chegaron ao goberno quedou libre esa parcela.

Intervén **Ramón García Argibay** dicindo: ¿Como que quedou libre? Fixemos xestión de planeamento, ¿como que quedou libre?. Intervén **José Manuel Miñones** dicindo: É moi fácil dicilo cando un chega e ten a parcela.

Intervén **Ramón García Argibay** dicindo: Non diga que quedou libre, as parcelas non saen do aire, ou se fai xestión urbanística, ou non se fai, e vostedes non tiñan a parcela e nós cando chegamos ao concello o primeiro que fixemos foi obter esa parcela igual que a do Milladoiro. Ás cousas hai que chamalas polo seu nome, igual que vostedes fixeron cousas boas e llas recoñecín moitas veces, recoñeza cando se fan as cousas non tan ben, tenas que recoñecer, non diga que non. A parcelas non aparecen do aire.

Continua coa súa intervención **José Manuel Miñones** dicindo: ¿Podo seguir? Como dicía, hai moitas cousas das que poderíamos estar falando pero non é o momento e dende logo non me diga “non politizar” cando utiliza precisamente eses argumentos. En canto ao alcalde, a min me gustaría que dera algunha resposta do moito que se falou aquí ou polo menos me conteste que lle aparece a proposta que lle facemos, se a vai estudar ou non, se lle parece ben, se é viable ou non é viable, se nestes 5 días que pasaron dende a comisión se molestou en saber se é viable esa proposta, se falou co departamento xurídico, se falou co departamento de Urbanismo; é dicir, gustaríanos saber se moveu algo neste asunto. Despois que fale de parche co tema do ampliación do centro de saúde do Milladoiro de 100 m², dígalle á xente que está a utilizar ese parche a ver se lle parece un parche ou unha alternativa ou unha solución naquel momento. ¿Que non é a mellor? Dende logo, pero precisamente porque estaba previsto a construción do novo centro de saúde. É o de sempre: se temos a previsión de facer un centro de saúde de preto de 3 millóns de euros, dous millóns e medio, ¿que imos facer? ¿Seguir ampliando e seguir gastando os cartos no que temos? Non. O que temos que ter lóxicamente é ese plantexamento e para levalo adiante manter o que temos no mellor estado posible. Por iso se fixo esa outra alternativa ou esa ampliación de servizo. Fala de por que non se cedeu outra parcela, dígame vostede cal, dígame vostede cal se puido ceder no 2008. Claro, ao mellor fala vostede da parcela que está no polígono e había que facer alí o centro de saúde, ou da parcela da que estamos a falar do instituto e perder o instituto. ¡Dígame cal! Tamén fala de Brión e do acordo que termina creo que en decembro deste ano e que despois se amplía ao 2015, que era dos anos 2013, 2014 e 2015.

Intervén o **alcalde** para dicir: Perdón, son dous acordos diferentes hai un acordo con Brión e outro é un acordo a nivel da Xunta e Deputacións e Concellos.

Continua **José Manuel Miñones**: O que temos con Brión termina en decembro deste ano e cando eu lle preguntei que alternativa había dixo vostede que se miraría. ¿Vai a esperar a decembro para miralo?. Contesta o **alcalde**: É que aínda non acabou o acordo con Brión, acaba en decembro. Continua **José Manuel Miñones**: Pero precisamente por iso hai que ter alternativas para cando remate. ¿Está traballando?. Contesta o **alcalde**: Vostede di que o acordo con Brión finaliza este ano, pero non finaliza este ano. Continua **José Manuel Miñones**: Finaliza no ano 2015. Intervén o **alcalde**: Efectivamente, o que lle dixen, por iso se estaba trabucando vostede.

Continua **José Manuel Miñones Conde**: De todas formas quérolle recordar que dende maio do ano pasado ten vostede un escrito no que pedimos copia dese acordo. Gustaríame tela e aproveito a ocasión para reiteralo. Intervén o **alcalde** dicindo: Xa lle demos copia do convenio. Intervén **José**

Miñones Conde e di: Non, que conste en acta, por favor, señora secretaria.

Intervén o **alcalde**: A copia do convenio con Brión, creo recordar que se lle deu acceso ao convenio. Intervén **José Miñones Conde**: Eu pido que conste en acta o que está dicindo o señor alcalde. Intervén **Pilar Candocia Pita** dicindo: Acceso non é copia. Intervén o **alcalde**: Creo que se lle deu acceso ao convenio que está firmado con Brión. Intervén **Pilar Candocia Pita** dicindo: Alcalde, ao final vamos volver aos tempos de Astray, que había que ir cunha cámara, porque non nos deixaba acceder aos documentos nin facer fotocopias.

Intervén o **alcalde**: Perdón señor Miñones, continúe.

Continúa coa súa intervención **José Miñones Conde** dicindo: Independentemente dese acordo que teñamos con Brión, xa quedou aquí ben claro e ben dito que non é suficiente para este Concello, que non é unha solución. Iso si que pode ser un parche. ¿Un parche necesario? Si, pero por iso mesmo é o momento de buscar a solución para un concello que segue medrando, estamos a falar de mais de 20.000 habitantes pero Ames segue medrando e a previsión é de que siga medrando. Polo tanto, teremos un problema dentro dun ano moito mais grave do que temos agora mesmo. Por último, facer unha aclaración: a parcela que foi desafectada, que foi o que veu ao pleno en abril do ano pasado, eses 2.000 m² non están cedidos á Igrexa, quero que quede ben claro, que non están cedidos. Iso terá que vir ao pleno e que me corrixa a señora secretaria se está cedido ou non, pero terá que vir ao pleno a cesión ou non deses 2.000 m²; ata onde nós sabemos o que está desafectada a parcela. Non existe unha cesión oficial, polo tanto non é que se perda esa cesión ou que haxa que facer un desacordo do feito no seu día, é dicir, o que hai é unha desafectación na que nós votamos a favor e agora o que terá que vir é unha cesión deses terreos para a Igrexa pero existe outra alternativa. Gustárame, polo tanto, que me respondera que lle parecen as propostas que facemos, se ten pensado estudalas ou non, e reiterar o que di vostede de que non se oculta a información dos contenciosos porque veñen nos decretos. Gustárame saber, señora secretaria, ¿cantos decretos se mandaron no 2013? ¿Sabe mais ou menos, 2000, 1000? 2.000 aproximadamente, para unha oposición que non ten dedicación algunha, pois si, buscaremos entre eses 2.000 decretos.

Intervén o **alcalde** para dicir: Efectivamente e independentemente de que aquí se falou de datas do 2008, no 2002 alguén dixo que se había anunciado e se había posto enriba da mesa unha parcela para centro de saúde onde está hoxe o colexio da Travesía do Porto. Intervén **Pilar Candocia** para dicir: Só se puxo un cartel, nunca á disposición, que daquela eu si que era concelleira. Intervén o **alcalde** dicindo: Ben, vostede dona Pilar falaba que se pregunte á xente. Eu non sei se naquel momento se lle preguntou á xente se prefería un colexio ou un centro de saúde, a min non me consta. Contesta **Pilar Candocia**: Iso non foi no 2002 iso foi no 2004. Intervén o **alcalde**: No 2003, antes das eleccións municipais do 2003. Intervén **Pilar Candocia Pita**: Antes das eleccións municipais do 2003 gobernaba Astray, non o podíamos preguntar nós.

Continua o **alcalde** dicindo: Se dixo aquí, que se falou de facer alí un centro de saúde, e cando chegou o goberno do 2003 se decidiu facer un colexio, que tamén era necesario. Se fixo a modificación dos plans parciais que forman parte do Plan Xeral, polos cales se confiren 8.200 m² aproximadamente, agora temos eses 2.000 m² que se trouxeron a este pleno para a súa desafectación, para ceder e para cumprir aquel convenio do ano 2001 coa Igrexa, polo cal, no seu momento o Concello se comprometía a dar unha parcela e o Concello recibía unhas parcelas da Igrexa, que xa foron ocupadas. Despois quedarían aproximadamente 5.000 m², estou falando en bruto, que é a mesma superficie que necesitaría o centro de saúde para albergar, ou para reubicar, ese proxecto que xa tivo entrada neste Concello; antes se me preguntaba se había un proxecto feito para a parcela do S-15 e si existe, entrou neste Concello. Como dicía, deses 8.200 m² resultantes desa modificación puntual dos plans parciais, teríamos eses 2.000 metros para a parcela da igrexa e 5.000 metros que poderían quedar para o centro de saúde se é factible, hai que facer algún tramite obviamente, e quedarían disponibles aproximadamente 1.200 m² Eu quérolles recordar que cando se cedeu a parcela para facer un parque de bombeiros, que

era de 4.600 m² se dicía que a estrutura do parque de bombeiros ía ocupar 800 metros aproximadamente así que ata 1.200 aínda teríamos metros; o mellor non chegar, pero ían a estar moi cerca. Quero dicir que cos 8.200 m² que agora temos, unha vez que se fixo a modificación deses plans, estaríamos en posibilidades, así a grandes rasgos, de que puideran entrar os tres equipamentos. Esa sería unha opción que é a que plantexa creo tamén o señor Miñones. Creo que o urbanismo en Ames está á vista de todos, vostede señor García ao mellor pretende ser o fenómeno do urbanismo en Ames. Eu creo que como xestionaba o urbanismo cando vostede era concelleiro quedou claro, cando puxo un técnico de fora para xestionar o urbanismo en Ames.

Intervén **Pilar Candocia** dicindo: Pero vostede era o alcalde daquela, aquí parece que botamos os balóns fora. Continua o **alcalde** dicindo: Hai un proxecto, como dicía antes, que se fixo para a parcela de 5.000 m² do S-15 pero que podería readaptarse, evidentemente obteríamos mais metros para completar os 5.000 metros e se están estudando opcións e se seguirán estudando.

Intervén, co permiso da presidencia, **Ramón García Argibay** dicindo: Por alusións señor alcalde, acaba de aludir vostede a mi. Vamos a ver, para que quede a cousa meridianamente clara. Primeiro: o que había era unha asistencia técnica para facer dúas modificacións puntuais do Plan Xeral, dúas, froito das cales temos estas parcelas. Polo tanto, eu non son ningún fenómeno pero polo menos obtivemos estas parcelas. Segundo: vostede é o alcalde, o meu superior, e tiña coñecemento perfectamente desa asistencia técnica, ¡home por Deus! ¿Que quere vostede dicir con iso? E que non esquezan as persoas que están aquí, porque os concelleiros xa o saben, que o único que tiña a firma nese goberno era vostede, señor alcalde.

Contesta o **alcalde** dicindo: Depende, apareceu un orzamento hai pouco de Plexus que só estaba firmado por vostede, así que non fale, para o que lle convén tiña firma e para o que non non a tiña.

Continúa **Ramón García Argibay**, dicindo: Non sei que pretende vostede, ¿non ve que iso é moitísimo peor para vostede? Está vostede quedando moitísimo peor, porque aquí esta todo moi claro. ¿Que se trouxo un técnico? Claro que se trouxo unha asistencia técnica que viña 3 veces á semana, polo tema, así de claro. Evidentemente, marchamos nós e se deixou de facer xestión, non existe o departamento de Urbanismo politicamente falando, logo despois non diga que estamos botamos en contra dos traballadores. Creo que todos os concellos serios do tamaño que ten Ames, teñen asistencias técnicas, todos; é mais, non telas é unha irresponsabilidade, polo tanto, vostede é un irresponsable, porque non fai xestión urbanística, polo tanto, as cousas claras.

Intervén o **alcalde** dicindo: O urbanismo no Milladoiro, por desgracia, a xente o leva sufrindo moitos anos. Pasamos á votación, primeiro a da emenda.

Intervén a **secretaria** para preguntar: ¿Cal é o texto da emenda?.

Intervén **Ramón García Argibay**, dicindo: Mais que unha emenda é unha engádegas *in voce* á moción que presentamos. Intervén **Susana Mallo** para dicir: *A engádegas é que se inste á administración competente a restaurar na súa totalidade o tellado do actual centro de saúde do Milladoiro.*

Rematadas as intervencións, procédese en primeiro lugar a votar a *emenda in voce* formulada pola concelleira Susana Mallo Redondo, consistente en engadir un punto quinto ao acordo da moción, resultando aprobada por maioría absoluta, cos votos a favor dos 6 membros do grupo municipal socialista, e dos concelleiros/as non adscritos Pilar Candocia Pita, Olalla Alvite del Río, Susana Mayo Redondo, Ramón García Argibay, M. Dolores Fernández Álvarez, Manuel José Ferreiro Santiago, Alfonso Rey López, María González Gómez e Emilio Martínez Carballeira, e a abstención dos 5 membros do grupo municipal popular.

Rematadas as intervencións o pleno da corporación por maioría absoluta do número legal de membros cos votos a favor dos 6 membros do grupo municipal socialista, e dos concelleiros/as non adscritos Pilar Candocia Pita, Olalla Alvite del Río, Susana Mayo Redondo, Ramón García Argibay, M. Dolores Fernández Álvarez, Manuel Jose Ferreiro Santiago, Alfonso Rey Lopez; María González Gómez e Emilio Martínez Carballeira, e a abstención dos 5 membros do grupo municipal popular, prestar aprobación á moción do teor literal seguinte:

"Expoñen

Fai xa 4 anos, en Febreiro 2009, tiña lugar na notaria do noso concello a firma para a cesión gratuíta de unha parcela para o Centro de Saúde do Milladoiro. Os asinantes foron o Alcalde de Ames, Carlos Fernández Castro e o Director Xeral da división de recursos económicos do Servizo Galego de Saúde. Esta firma tiña lugar despois de que o pleno da corporación, en abril de 2008, aprobase por unanimidade a cesión desta parcela ao Sergas. A parcela está situada no sector S-15 "Travesía do Porto Sur" con unha superficie de 5.000 m² con uso de equipamentos públicos.

Nese pleno de abril de 2008, o voceiro do PP de Ames, hoxe Alcalde, dixo textualmente: "alegrámonos de que se inicien estes trámites despois de 5 anos falando do tema. En maio de 2003 o conselleiro de Sanidade, Xosé María Hernández Cochón e o alcalde de Ames naquel momento, Xosé Astray, asinaron un convenio de colaboración no que se acordaba cederlle á xunta unha parcela do S-14 de 3.000 metros cadrados na que construír o centro de saúde. No ano 2006 fíxose un cambio de uso desta parcela na que se construíu o actual centro de educación infantil do Milladoiro. Naquel momento espíuse un santo para vestir outro. E agora levamos cinco meses agardando pola inscrición da parcela no rexistro da propiedade"

En abril do ano 2012, en Xunta de Goberno Local, aprobouse a modificación puntual dos plans parciais S-14 e S-16, con esta aprobación na zona da do S-14, Travesía do Porto Norte, o que se pretendía era obter una parcela como alternativa para albergar o novo centro de saúde do Milladoiro, en previsión do que puidera pasar cos problemas xurídicos nos que estaba envolto o S-15 "Travesía do Porto Sur".

En agosto do ano 2012, tamén en Xunta de Goberno, aprobouse de forma inicial o plan parcial S-15 "Travesía do Porto Sur" e a modificación puntual do S-14 "Travesía do Porto Norte. E no mes de Abril do ano 2013, o pleno, por unanimidade, aprobou o S-15 "Travesía do Porto Sur" xa de forma definitiva.

En resumen, dende ese pleno do ano 2008 no que o actual alcalde exercía como portavoz do PP na oposición ata agora, pasaron nada máis e nada menos que 6 anos, dos cales, máis de un terzo de este tempo, corresponde ao actual mandato do PP, e a situación segue sen visos de solución a pesar de que en vez de unha, agora hai dúas parcelas que cumpren as características suficientes para a construción do Centro de Saúde do Milladoiro. Cuestión esta que deixa patente unha vez máis a pouca vontade e a falta de sensibilidade que o goberno Popular de Ames mostra por solucionar un tema de primeiro orden como é este.

Apesares de que o Milladoiro está preto dos 15.000 habitantes, que ten un centro de saúde impropio, inadecuado e insuficiente, nos orzamentos da Xunta de Galicia para o ano 2014, non figura partida económica para a construción deste novo Centro de Saúde e polo tanto, parece que as intencións da Xunta de Galicia non son nada alentadoras.

Despois de sufrir "O Milladoiro, o que está por ver" do anterior alcalde socialista, agora temos unha actitude e aptitude por parte do goberno do PP que demostra claramente a nula preocupación e sensibilidade que teñen cara un problema de primeiro orden no que se está inmerso dende fai moitos anos e que padecen a diario tanto usuarios como o persoal do centro de saúde do Milladoiro.

Dende PxA consideramos que xa é hora de que dunha vez por todas, o Milladoiro teña un Centro de Saúde que se merece, un centro de saúde digno e con unhas condicións axeitadas e como correspondería a unha poboación de preto de 15.000 habitantes.

A pesares de que nos orzamentos da Xunta de Galicia non figura partida económica para este centro de saúde, dende PxA sabemos que si a Consellería de Sanidade ten vontade, pode dispoñer dos orzamentos suficientes para que a súa construción se inicie ao longo deste ano. Por iso, os concelleiros de PxA presentamos á consideración deste pleno a seguinte Moción.

1. Instar a Xunta de Galicia que no prazo máis breve posible requira ao concello de Ames todas as cuestións técnicas e administrativas necesarias pendentes para poder levar a cabo a construción do Centro de Saúde do Milladoiro.

2. Instar a Xunta de Galicia a acometer coa máxima urxencia posible todos os trámites necesarios para comezar a construción do novo Centro de Saúde do Milladoiro.

3. Facultar ao alcalde do concello de Ames para que realice todos os tramites necesarios nas xestións inherentes a este tema.

4. Que a partir da aprobación de esta moción, se informe nos sucesivos plenos ordinarios do estado das xestións relacionadas o Centro de Saúde do Milladoiro.

5. Se inste á administración competente a restaurar na súa totalidade o tellado do actual centro de saúde do Milladoiro."

Intervén **Ramón García Argibay** para facer a seguinte explicación de voto: Señor alcalde, creo que queda patente cal é a actitude do goberno. Acaban de absterse nun punto tan importante como é o centro de saúde do Milladoiro e non contestou nin unha soa das preguntas que lle fixeron dende a bancada da oposición. Contesta o **alcalde** dicindo: Señor García, moitas destas xestións son de cuestións que xa se están facendo.

Punto décimo.- Moción presentada polo grupo municipal socialista, con núm. R.E. 1744, de 14 de febreiro de 2014, relativa a instar á Xunta de Galicia o mantemento do Servizo Galego de Apoio á Mobilidade Persoal para persoas con discapacidade e/ou dependentes.

O **alcalde** cede a palabra a un representante do grupo municipal socialista para expoñer o contido da moción.

Intervén a concelleira **Isabel González Cancela**, que di: Boas noites a todas e a todos. Nesta moción queremos resaltar sobre todo que é un recorte mais aos dereitos, como imos vendo nos últimos tempos do Partido Popular, como puidemos ver co copago farmacéutico, quitando a Lei de dependencia e agora tócalle ao 065. Non vou a ler toda a moción, porque xa a tedes todos os da Corporación e xa a miramos na comisión informativa, pero sobre todo o que vou dicir é que neste anteproxecto que quere levar a cabo a consellería de Traballo, unha das medidas mais restritivas e limitadoras que recolle é que a partir de agora se vai a incrementar o grao de minusvalía para poder acceder a este transporte, que pasaría do 65% ao 75%, deixando a criterio da Xunta fixar a intensidade do uso. Pasa a computar unha viaxe de ida e volta como se foran dous servizos, ou sexa, se te levan e traen ao centro de día son dous servizos, ata agora era un e agora pasan a ser dous. Elimina a obrigatoriedade de contar no transporte con persoa acompañante, que agora é obrigatorio. Outra cousa que quita é que ata agora a xente tiña un prazo para chamar e pedilo, que era de 48 horas, e agora anúlase, é dicir, non se sabe cando a xente ten que solicitar. A maiores, quere establecerse un tope de viaxes ao mes e desentenderse do servizo delegando nas asociacións do sector a xestión do mesmo. Sobre todo vai a afectar aos centros mais pequenos; seguramente que os grandes centros, vamos a dicilo porque así saíu recollido na prensa, estarán contentos con esta medida, porque pasarán seguramente a privatizarse e eles serán os que levarán este servizo, sobre todo os grandes centros. Estas medidas implican un especial prexuízo para os beneficiarios residentes sobre todo nas zonas rurais e para os discapacitados por danos cerebrais, así como para os seus coidadores, que a partir de agora terán que dedicarles mais horas de atención. A consellería de Traballo pretende con estas medidas restritivas que propón poñer en marcha volver aos tempos do franquismo, aos tempos nos que se agochaba a realidade dos discapacitados e dependentes, manténdooos pechados nas súas casas. Sen lugar a dúbida a Xunta de Galicia restrinxen gravemente os dereitos dos discapacitados e dependentes a gozar dunha liberdade e igualdade reais e efectivas. Como antes tamén xa se comentou, foros moitos os concellos que levaron esta moción aos plenos, concellos de distintas cores políticas, como pode ser o caso da Estrada que antes se mencionou, que non só votou a favor desta moción, senón que como esta moción tamén implica poñer o copago para os usuarios, o concello da Estrada dixo que se este decreto ía adiante, eles se ían a facer cargo de pagar ese copago aos usuarios do seu concello, e iso que é un concello gobernado polo Partido Popular, non polo Partido Socialista, nin polo BNG, nin por outros partidos. O que pedimos nesta moción é instar á Xunta de Galicia e á consellería de Traballo e Benestar Social a que procedan á retirada do proxecto de Decreto polo

que se regula o Servizo Galego de Apoio á Mobilidade Persoal para persoas con discapacidade ou dependentes, e a manter o citado Servizo nas condicións nas que se ven prestando na actualidade, isto é, a tenor do establecido no Decreto 195/2007, de 13 de setembro. Tamén pedimos dar traslado do presente acordo aos grupos políticos do Partido Popular, Partido Socialista de Galicia, Alternativa Galega de Esquerdas e Bloque Nacionalista Galego, grupo mixto do Parlamento Galego, a fin de que adopten as iniciativas pertinentes destinadas a dar cumprimento. Temos constancia de usuarios aos que xa lles están chegando cartas dicíndolles que a partir do 1 de marzo, aínda sen estar aprobando o Decreto que aínda se esta negociando, xa van a entrar estas medidas, e algúns usuarios son do noso Concello, e temos constancia de que a partir do 1 de marzo van a quedar sen este servizo. Por iso presentamos esta moción.

O alcalde abre unha primeira quenda de intervencións, tomando a palabra a concelleira **Pilar Candocia Pita**, que di: Eu vou a ser breve porque creo que xa está clarísimo que se trata de recortar dereitos, dereitos que ademais son dereitos fundamentais, a axuda á dependencia é algo moi necesario neste Concello e en todo o país, especialmente nun país tan envellecido como este, isto é clarísimo. O que non ten sentido é que se leve a un discapacitado a un sitio a e que despois non se lle recolla, eu nunca vin nada igual. Ou que se necesita ir 20 días ao centro de día se lle vaia a reducir o número de viaxes. Eu creo que é bastante evidente que vai na liña do goberno do Partido Popular en Madrid, en Santiago e na Cochinchina, de recortar os dereitos da cidadanía e de vender unha falsa austeridade que non é mais que empobrecer á sociedade e levarnos outra vez, por mais que non nos guste, a tempos moi pretéritos, de antes da democracia, é a realidade, estamos volvendo aos anos 40 en moitas cousas, e esta é unha delas. Se recortan servizos e se privatizan, porque ao final detrás disto están os intereses das grandes empresas, que podería citar moitas, pero hai moitas no sector e son iguais unhas que outras, é dicir, das grandes empresas que teñen grandes centros que teñen capacidade para ofertar servizo de transporte. Por iso se move o alcalde da Estrada e se moven fundamentalmente os alcaldes das vilas pequenas sexan do Partido Popular sexan do que sexan porque pensan nos seus veciños e non son delegados do Partido Popular, debería de tomar exemplo deles; pensan nos seus veciños porque eles teñen centros públicos pequenos, que agora non recollen ese servizo, e se non hai ese servizo non teñen como levar a esas persoas a ese centro de día ou que se trasladen ao centro médico dende as súas aldeas. Ademais hai unha dobre responsabilidade por parte da Xunta porque a Xunta foi incapaz, durante moitos anos, de poñer enriba da mesa un plan serio de transporte no rural que permita moverse aos cidadáns dende as aldeas ata os núcleos para acceder aos servizos, porque os núcleos son onde están os servizos, e os poucos que hai, aínda que son os que se puxeron en marcha, é verdade que son para colectivos moi determinados. Non son xeneralizados para todo o mundo que os necesite, pero os poucos que hai, encima os recortan. Podería estar falando 3 horas pero non é necesario. Ademais, sei que sodes cidadáns moi avisados e a Corporación tamén, eu creo que está clarísimo. Por iso nada mais que aclarar que o noso voto, por suposto, vai a ser favorable.

Intervén a concelleira **M^a Dolores Fernández Álvarez**, que di: Desde Pacto x Ames echamos de menos una exposición de motivos un poco mas rigurosa y me explico: la moción hace un *remix* de un Decreto que se aprobó en septiembre del 2013, que es el Decreto 149/2013, de 5 septiembre, “por el que se define la cartera de servicios sociales, para la promoción de la autonomía personal y la atención a las personas en situación de dependencia y se determina el sistema de participación, de las personas usuarias en la financiación de su coste”, se hace un *remix* con este proyecto de Decreto en el que se fundamenta vuestra moción, “por el que se regula el servicio gallego de apoyo a la movilidad personal para las personas con discapacidad y dependientes”, lo explica claramente el artículo 5.4 del proyecto que dice que “*quedan excluidos del sistema de transporte contemplado na presente norma os traslados que con carácter regular se realicen a calquera tipo de centro para recibir servizos de carácter permanente, en tanto que este tipo*

de traslados regulares están comprendidos no ámbito de aplicación de Decreto 149/2013, do 5 setembro, polo que se define a carteira de servizos sociais”. Hay claros exemplos de este *remix* en la exposición de motivos de la moción del grupo municipal del partido socialista, por exemplo cuando dice que hay un tope de viaxes, efectivamente, cuando dicen que se desentienden del servicio delegándose en las asociaciones del sector la gestión del mismo, efectivamente, esto hace referencia al Decreto que está en vigor desde setembro, por otro lado, cuando dice que se incrementa el grado de minusvalía para poder acceder, esto es en el anteproyecto, se debería de haber diferenciado. Luego, en una de los puntos del acuerdo, aludís al Decreto 195/2007, del 13 de setembro, regulador del servicio gallego de apoio a la movilidad de la época de Anxo Quintana y de Emilio Pérez Touriño, que como bien recoge la moción se constituía como un servicio publico de transporte destinado a facilitar el desplazamiento programado y no urgente. Por tanto, estamos en realidad coincidiendo, tanto en el Decreto 195/2007 como en este anteproyecto que tenemos ahora. También puedo decir, efectivamente, que este Decreto se fue desfigurando con el tiempo y el transporte adaptado del 065 si que hacía desplazamientos regulares. El problema que vemos desde Pacto x Ames son los centros pequeños de servicios sociales, pues lo tienen más difícil a la hora de contratar el transporte adaptado, como bien estabais diciendo ahora. Seguramente nuestro Arcea - Adames y el caso de nuestros dependientes, nos quedará la Fundación de Negreira, y que no tenga problemas en sus desplazamientos y entendemos que sería aquí donde esta moción debería volcarse. También, como ya recoge la exposición de motivos, en que sea gratuito, en que no se eleven el porcentaje de minusvalía, en que computen un solo viaje y no como dos los desplazamientos, en eso si que estamos de acuerdo los concejales de Pacto x Ames. Ya para terminar, diría que en la frase donde decís que *volvemos aos tempos do franquismo*, creo que es una alusión extemporánea y que va siendo hora de pasar página. Nuestro voto va a ser favorable, a pesar de que ha existido ese pequeño *remix*, nada mas.

Intervén, co permiso da presidencia, o voceiro do grupo municipal popular **Bernardo Moar Míguez**, que di: Boas noites a todos e a todas. Boto un pouco de menos que non dera lectura á moción, despois na segunda quenda direi o por que. O que quero dicir é que o 065 ten que garantir por Decreto non ter custe para o usuario. Os 7.000 usuarios actuais manteñen intactos os seus dereitos. O grao de satisfacción do servizo 065 actualmente non era o axeitado, nin polas persoas que quedaban sen atender nin polas atendidas, xa que non sempre se podían realizar os servizos solicitados. Esta situación obriga a unha revisión en aras a incrementar a satisfacción dos usuarios e de achegar o servizo a mais beneficiarios. Aproveitase o fin do contrato actual, realizado polo bipartito e cunha duración de 5 anos, para cambiar o modelo e convertelo nun modelo mais efectivo. Esta revisión elaborouse por expertos e foi dialogada con usuarios habituais deste servizo. As conclusións e suxerencias de mellora levan a que para conseguir os obxectivos cómpre manter o 065 cun servizo de transporte publico adaptado para as persoas que non poden utilizar o transporte publico ordinario e precisen de servizos puntuais. Garantir o servizo de transporte regular de todos os usuarios da totalidade dos centros de titularidade da Xunta ou noutras modalidades sostidas con fondos públicos, homoxeneizando as situacións actuais existentes, apoiar o desenvolvemento do transporte a outros centros a través das entidades, incrementando as contías e o concepto de praza pública. En definitiva, con este novo sistema todas as persoas con dereito ao servizo van seguir sendo atendidas e mantense a gratuidade do 065, á vez que se homoxeneiza o servizo de transporte regular e apoiase ás entidades con discapacidade. Polo tanto, non hai ningún desmantelamento, o orzamento para este recurso está blindado e volverá a ser preto de 4 millóns de euros. O que sería desexable é lembrar que por quinto ano consecutivo o gasto social gaña peso nos orzamentos da Xunta de Galicia. Se comparamos os orzamentos do ano 2009 cos do ano 2014 se observa ás claras que o gasto social experimenta unha suba de case 10 puntos porcentuais. E para esta primeira quenda, nada mais. Grazas.

Intervén **Pilar Candocia**, que di: Eu entendo que non lle guste que riamos, pero é que de verdade, ¿vostede cree que é normal que nos lean iso?. Intervén o **alcalde** dicindo: É que vostede quere que lle atenda e polo mesmo motivo dona Pilar eu podo falar e que vostede non me chame a atención, hai que usar a mesma vara. Intervén **Pilar Candocia** dicindo: Eu estaba calada, rindo polo abaixo pero caladiña. Vostede é o alcalde e en todo caso tenme que corrixir a min se fago mal algo, e dar exemplo sempre, pero dende logo non creo que sexa o caso. Intervén o **alcalde**

dicindo: Non, eu non a corrixo.

Continúa a súa intervención **Pilar Candocia** dicindo: Quero dicirlle que é inadmisíbel que o señor Moar, unha vez máis, nos veña aquí a ler un comunicado da Xunta. ¡Xa sabemos o que di a Xunta! É o comunicado de prensa, xa o sabemos, lemos a prensa e a súa páxina web. Xa sabemos o que di a Xunta, pero díganos algo que veña ao caso. ¡Claro que eles din que é perfecto e que o van a facer moito mellor que o bipartito! ¡Xenial, supérennos que non son capaces de superarnos, supérennos dunha vez! Fagan algo máis que cambiar de nome ás cousas, porque ata agora foi o único que fixeron. ¿Non lle querían chamar 065? Chámenlle X, a min que máis me da, pero déanlle os servizos aos usuarios, que é do que se trata. A min me da exactamente igual como lle chamen ao servizo, pero non nos veñan a contar milongas; que resulta que temos que cambialo para melloralo porque non é universal e viña en dous servizos diferentes. A min non me importa que veña en dous servizos diferentes, a min o que me interesa é que se teño 75 usuarios, eses 75 usuarios estean seguros de que os van a levar e traer, que non só os van a levar ou só a traer, e que haxa garantías de que se faga o servizo. Eu creo que ese Decreto non da garantías. Efectivamente, eu estou de acordo en que o 065 é moi fácil superalo porque era un proxecto que se puxo a funcionar experimentalmente e dende que cambiou o goberno quedou así, sen continuado. É normal que haxa que superalo e non pasa nada se é para ben, pero é como todo o que se fixo dende o 2009 para aquí, se cambia de nome, como fixeron con outras cousas, pero se deixa o proxecto porque non son capaces de superalo e así o din os representantes do Partido Popular. Non son capaces de superalo, como por exemplo as galeascolas que lles chaman galiñas azuis, cambiaron o nome e os carteis, gastaron diñeiro en cambiar os carteis foi o que cambiaron, pero o proxecto intocable e tamén os mandilóns que tamén molestaba moito o mandilón azul e branco. Ademais, o único malo das galeascolas foi o nome, non todo o demais. Eu non solo o reivindico senón que reto que haxa un comité de expertos que avalíe ese e o que tiña a Xunta, a ver cal é o mellor. Despois de dito isto, co 065 máis do mesmo, é dicir, seguro que tiña moitísimos defectos, porque ademais é un plan experimental e eu creo que efectivamente hai que cambialo, en 5 anos xa é tempo de darlle unha volta, pero non son modos de darlle a volta. O Partido Popular que nos diga o que nos ten que dicir, se ten que defender esa proposta que a defenda, pero que a defenda con honradez, que non digan como din sempre que non hai cartos xa que nos deixaron arruinados e entón temos que sacalo dalgún lado e sacamos como sempre do bolsillo dos que menos teñen, que o digan con honradez, que non veñan a lernos un comunicado. Que eu saiba o señor Moar cobra do concello de Ames e non da Xunta, non ten porque vir a ler comunicados da Xunta.

Intervén, co permiso da presidencia, **M^a Dolores Fernández Álvarez**, para dicir: Programa, programa, programa, decía Julio Anguita, y argumentar, argumentar y argumentar que nos dice el señor Moar. De todos modos, nos gustaría saber cual es la opinión de este gobierno sobre esta moción, de este gobierno del Partido Popular de Ames.

Intervén, co permiso da presidencia, **Isabel González Cancela**, para dicir: Primeiro, con respecto ao que comentabas da moción, me gustaría que iso tamén se tivera dito na comisión informativa e o podíamos ver. A min me gustaría primeiro que o señor alcalde me dixera cales son as competencias de cada concelleiro neste Goberno, iso para empezar, porque ao mellor as cambiou. Me gustaría que o señor alcalde me dera unha certificación de cales son as competencias de cada concelleiro do seu goberno, porque ao mellor as cambiou e resulta que o resto da oposición non nos enteramos. Non pasa nada, se vostede as cambiou está no seu dereito, e senón modifíqueas segundo consta na páxina web, non pasa nada.

Intervén **Bernardo Moar Míguez** dicindo: Está colgada na páxina web. Continúa **Isabel González Cancela**: ¿Vostede é concelleiro de Servizos Sociais? ¿É vostede concelleiro de Servizos Sociais, de Igualdade, vostede é concelleiro de todo?. Contesta **Bernardo Moar Míguez** dicindo: Son voceiro do grupo municipal popular. Agora lles vou a pedir permiso a

vostedes para poder intervir ou non, era o que faltaba.

Continúa **Isabel González Cancela**: Tamén está o que acaba de dicir Pilar: eu para ver unha nota de prensa que esta colgada na paxina web da Xunta de Galicia, a collo eu, a leo e punto. Non teño falta de que vostede ma veña a ler aquí. De verdade, moito mais non saberemos pero ler a páxina web da Xunta de Galicia sabemos. É o que vostede fai cando actúa de voceiro neste pleno nos temas de Igualdade e nos temas de Servizos Sociais ultimamente, sobre todo nos de Igualdade. Intervén o **alcalde** dicindo: Perdoe dona Isabel, vostedes o único que fan é poñer Ames nesta moción, é xenérica para todos os concellos. Perdón, continúe.

Continúa **Isabel González Cancela**: E despois dígalle vostede a eses usuarios que o día 1 de marzo quedan sen o servizo, que van a telo igual segundo vostede acaba de ler. A min gustárame que llo dixera porque recibiron unha carta dicindo que a partir do 1 de marzo se quedan sen servizo. Léalles ese comunicado, ao mellor válelles, léallo a eses veciños de Ames censados no Concello de Ames, dígallo señor Moar, portavoz do Partido Popular.

Intervén, co permiso da presidencia, **Bernardo Moar Míguez**, dicindo: Como ben dicía antes, a min me houbera gustado, para que constara en acta, que tivera lido a moción. Hai referencias que me gustaría facer de esta moción, en concreto nun parágrafo que pon a *prestación do servizo efectuábase directamente con medios propios ou contratando o servizo a empresas do sector, establecéndose un custo para o beneficiario que oscilaba entre a gratuidade, para os que tiveran rendas menores ao 75% do IPREM e o 16% do custe real, para as rendas superiores ao 250% do IPREM*. Ou sexa que copian, solo lle poñen Ames e espero que non a estean presentando así en todos os concellos. Despois cando rematan e instan ao presidente da Xunta a que aplique o Decreto 195/2007, do 13 de setembro, se collemos o Decreto 195/2007, do 13 de setembro, onde no artigo 13 determina individualizadamente a porcentaxe de participación dos usuarios no financiamento do servizo, falamos do 16% e aquí o que pon é: *“Los usuarios con unos ingresos superiores al 250% IPREM asumirán hasta un máximo del 100% del coste del servicio; los usuarios con unos ingresos superiores al 175% que no excedan del 250% del IPREM, asumirán hasta un máximo del 75% del coste del servicio; de 125 a 175 el 50% y del 75 al 125 el 25% del coste del servicio.”* Así que por favor, cando corten e peguen, polo menos copien ben. Moitas grazas.

Rematadas as intervencións o pleno da corporación por maioría absoluta do número legal de membros cos votos a favor dos 6 membros do grupo municipal socialista, e dos concelleiros/as non adscritos Pilar Candocia Pita, Olalla Alvite del Río, Susana Mayo Redondo, Ramón García Argibay, M. Dolores Fernández Álvarez, Manuel Jose Ferreiro Santiago, Alfonso Rey Lopez; María González Gómez e Emilio Martínez Carballeira, e o voto en contra dos 5 membros do grupo municipal popular, presta aprobación á moción do teor literal seguinte:

"EXPOSICION DE MOTIVOS

En outubro de 2007 a Xunta de Galicia, presidida por Emilio Pérez Touriño, creaba e regulaba o funcionamento do Servizo Galego de Apoio á Mobilidade Persoal para persoas con discapacidade e/ou dependentes. Este servizo ven sendo mais coñecido como 065.

Con esta medida dábase cumprimento á encomenda ós poderes públicos de Galicia, recollida no artigo 4, 2 do Estatuto de Autonomía, de promover medidas para que a liberdade e a igualdade do individuo fora real e efectiva, adoptando solucións para remover os obstáculos que as puideran impedir ou dificultar.

O 065 constituíase como un servizo público de transporte destinado a facilitar o desprazamento programado e non urxente de persoas discapacitadas e/ou dependentes imposibilitadas para utilizar transportes colectivos de uso xeral.

Esta prestación facilitadora da mobilidade permitía ós beneficiarios acudir a consultas ou tratamentos sanitarios; trasladarse a residencias, centros de día e outros equipamentos públicos de aloxamento; a actividades educativas ou formativas; a centros de servizos sociais nos que se desenvolveran programas ou actividades do seu intres; e os necesarios para a realización de actividades básicas da vida diaria: xestións administrativas, actividades terapéuticas ou rehabilitadoras.

A prestación do servizo efectuábase directamente con medios propios ou contratando o servizo a empresas do sector, establecéndose un custo para o beneficiario que oscilaba entre a gratuidade, para os que tiveran rendas menores ó 75% do IPREM, e o 16% do seu custe real, para as rendas superiores ó 250% do IPREM.

Dende a chegada do Presidente Feijoo ó goberno da Xunta se ten producido un continuo degradamento na calidade do servizo, denunciado reiteradamente polos beneficiarios: non poder asistir a citas médicas, por incomparecencia do transporte previamente confirmado; denegación do servizo, por non existir vehículo dispoñible; servizos incompletos (facilitábase a viaxe de ida, pero non a de volta); falla de resposta ás solicitudes efectuadas; grandes retrasos (mais de dúas horas) nas recollidas; etc.

Recentemente a Consellería de Traballo e Benestar Social intenta deteriorar, inda mais, o servizo, presentando un borrador de decreto que ven ser a puntilla definitiva ó transporte adaptado 065.

Este documento recolle unha serie de medidas mais restritivas e limitadoras do servizo: incrementa o grado de minusvalía para acceder do 65% o 75%; deixa a criterio da Xunta o fixar unha intensidade máxima de uso; computa un viaxe de ida e volta como dous servizos distintos; elimina a obrigatoriedade de contar no transporte coa asistencia de monitor-acompañante; o recoñecemento da condición de usuario do 065 non implica o dereito á prestación; non fixa un prazo para solicitar e anular os servizos (na actualidade é de 48 horas).

A maiores quere establecerse un tope de dez viaxes ó mes e desentenderse do servizo delegando nas asociacións do sector a xestión do mesmo.

Estas medidas implican un especial prexuízo para os beneficiarios residentes en zonas rurais e para os discapacitados por danos cerebrais, así como para os seus coidadores que terán que dedicarlles mais horas de atención.

A Conselleira de Traballo e Benestar Social pretende coas medidas restritivas que propón poñer en marcha, volver ós tempos do franquismo, ós tempos nos que se agochaba a realidade dos discapacitados e dependentes, manténdooos pechados nas súas casas. Sen lugar a dúbida estas pretensións da Xunta de Galicia restrinxen gravemente os dereitos dos discapacitados e dependentes a gozar dunha liberdade e igualdade reais e efectivas.

Por todo o anterior o GRUPO MUNICIPAL DO PARTIDO DOS SOCIALISTAS DE GALICIA-PSOE de AMES presenta ó Pleno a seguinte PROPOSTA DE ACORDOS:

1º. Instar ó Presidente da Xunta de Galicia e á Conselleira de Traballo e Benestar Social á que procedan á retirada do proxecto de Decreto polo que se regula o Servizo galego de apoio á mobilidade persoal para persoas con discapacidade e/ou dependentes, e manter o citado Servizo nas condicións nas que se ven prestando na actualidade, isto é, a tenor do establecido no Decreto 195/2007, de 13 de setembro, e demais disposicións legais que o teñen desenvolvido.

2º. Dar traslado do presente acordo ós grupos políticos do Partido Popular, Partido dos Socialistas de Galicia-PSOE, Alternativa Galega de Esquerdas e Bloque Nacionalista Galego, grupo mixto do Parlamento Galego, a fin de que adopten as iniciativas pertinentes destinadas a dar cumprimento ó acordado neste punto.

Intervén Pilar Candocia Pita dicindo: Se atreveron a votar en contra, menos mal.

Punto décimo primeiro.- Moción de urxencia para reclamar o dereito a votar no CEP de Ventín unha xornada continua.

Intervén o alcalde para dicir: Esta moción está presentada por vía de urxencia. Foi consensuada por toda a Corporación municipal e a ANPA do Colexio de Ventín. Intervén, co

permiso da presidencia, **Susana Mallo Redondo** para ler o texto da moción asinada por todos os membros da Corporación.

O **alcalde** abre unha primeira quenda de intervencións. Intervén, **Susana Mallo Redondo**, que di: Esta moción vai ser aprobada por unanimidade, como non podía ser doutro xeito, e iso non podería escatimarnos unha reflexión que eu creo que aínda así hai que dar. Neste escrito que propoñen as familias dinse cousas durísimas, durísimas contra a administración e durísimas contra os políticos. E aquí estamos os políticos e aquí esta a administración. Dise sobre a Xunta de Galicia, pero nós non estamos exentos e falo obviamente do concello de Ames, que foi quen ata agora ostentou algún tipo de representación neste problema. Estas familias conseguiron por primeira vez unha proposta que parecía valerlle a todo o mundo, que era poder votar algo que convencera ás familias, era a primeira vez que podían votar por suxestión do secretario xeral técnico, o señor Oitavén, unha xornada que eles decidisen cal podía ser, nunca tal cousa se dera, e estaban obviamente optimistas porque se consultas a toda a poboación educativa e se consegues esta aplastante maioría de familias a favor dunha proposta, crees que está todo feito. Pero os mesmos políticos, que cando lexislan deciden que por unha vez na comunidade educativa os pais decidan, porque é raro nos temas educativos que os pais tomen algunha decisión, os mesmos políticos que lles din: “*si, ustedes decidirán sobre este tema*”, son os que cando toman as rendas da administración e gobernan, buscan ensarillar, enmarañar e ao final tomar o pelo, que é o que se lles fixo a estas familias. Tomarlles o pelo, porque ao final como din eles estase gobernando para a empresa privada, estase gobernando para as empresas de transporte e a Educación non pode vir dirixida por empresas de transporte. ¿E onde quedamos nós? Hoxe falouse de politizar e de non politizar. Eu si quero politizar, eu quero facelo porque eu son das persoas que defende dende sitios diferentes a este, incluso dende as propias ANPAS, que a política non sempre é mala, que a política pode servir para conseguir cousas, a política educativa, a política escolar, a política do transporte. E se algún día se rexenera a imaxe da política, será porque algúns demostramos que hai outra forma de facer política, pero esta ca que se está atopando a xente de Ventín, non; está non é a forma de facer política e nós tampouco o fixemos ben, porque estas familias, entre outras cousas, din aquí que *foron ninguneadas*, efectivamente, déuselles un prazo para unha reunión longuíssimo, con meses esperando por unha reunión, que logo se fai xusto días antes de que remate un prazo para poder propoñer a xornada lectiva. ¡Que casualidade! ¿Que pensaron eles, como é normal? Pois que isto fíxose a propósito para que non nos dea tempo. E ademais chegaron a esa reunión buscando alternativas, e díxoselles esta é a última, aquí non se volve falar. ¿E que fai o noso concelleiro? Ir de compañía. Acompañar pódese acompañar de moitas maneiras, pero esa non é a función dun concelleiro de Educación e non é a súa función cando ten que ir coa súa cidadanía, estamos falando da administración local, da administración que está ao pe das cousas, dos concelleiros que teñen unha porta para que a xente chame a ela, e non pode ir soamente acompañando. ¿Que as ANPAS piden reunión? Vou ao lado. ¿Que as ANPAS volven a pedir reunións? Volvo a ir. Actitude, a mellor, non lle vou a dicir que tivera mala actitude, pero non era iso. Era conseguir que o señor Oitavén os recibira moitísimo antes; era non permitir que lles dera un ultimato e lles dixera “*non me volvo a reunir con vós*”; era dicirlle ao señor alcalde *arrímese aquí, poñámonos a remar e fagamos política*. Porque aquí hai que facer política, está claro que o señor Oitavén non está administrando, esta facendo política. Unha vez dixo e dígoo para as persoas que non sexan do Milladoiro que hoxe serán as menos, unha vez dixo que non se podía poñer transporte despois do comedor porque o comedor era municipal. Agora pódese poñer despois do comedor, pero non se pode poñer antes, que era o que se podía facer. Outra vez era o transporte ao Eduardo Pondal o que impedía facer reaxustes en Ventín; agora non hai transporte ao Eduardo Pondal, agora resulta que é Cacheiras. Doutra vez a normativa estaba en vigor; resulta que os contratos se aprobaron de novo e renováronse de novo fai dous anos, *nin mu*. Non se informou para que en Ventín se puidera facer algo. Isto todo demostra que o criterio vai co vento ou segúen quen veña pola porta. Mareámoslos por este lado e mareámoslos polo outro. Polo tanto é política, a Xunta de Galicia xoga á política, á política das empresas de transporte. O que se nos está pedindo nesta moción que todos vamos a apoiar non é simplemente que asinemos, nin é que acompañemos, non é que nos poñamos ao lado como floreiros e digo por todos, para que non haxa ningunha dúbida, non podemos ir de floreiros a esa reunión, nós temos que ir *remanganditos* a poñer política enriba da mesa, política local, apostando polos nosos veciños que é a nosa obriga e senón non valemos para a política. Nada mais.

Intervén, co permiso da presidencia, **Ramón García Argibay**, que di: Moi boas tardes outra vez. Eu sen embargo, dona Susana, discrepo radicalmente da exposición que vostede acaba de facer e sobre todo en canto ás formas, e lle vou a explicar porqué. Primeiro, me gustaría darlle a enhoraboa a toda a comunidade educativa, a toda a comunidade educativa, absolutamente a toda. Porque empezaron dun xeito discreto, dun xeito normal, como hai que facer as cousas, con sentido, con tenacidade, con organización, falando coa xente, cos pais, con toda a comunidade educativa, dirección, etc. E aí é a diferenza entre a política como concepto que ten vostede e a que temos nós, esa é a gran diferenza. A política ten que estar aquí, agora, hoxe, onde vamos a votar todos por unanimidade. Pero insisto, quen está de enhoraboa é a comunidade educativa en xeral. E os políticos e a política, ese concepto que temos de non querer facer política deste tema, a xente o ten moi claro, moi claro. A política é necesaria, imprescindible, e hai que facela todos os días, aquí, todos os días; e cando hai un tema como este, sensible, onde temos que tirar todos do carro, aprobando unha moción como esta por unanimidade é onde hai que facelo e despois presionar ao alcalde e ao grupo de goberno para que cumpra os obxectivos que ten que cumprir, iso é o que temos que facer nós, nada mais. O resto, o que quere a comunidade educativa, saben perfectamente e nolo transmiten a nós, e nós temos que trasladado a onde hai que trasladalo e pelexar, pero dende logo eu considero que o señor Moar, que acompañou, estivo, e evidentemente non vou a ser eu quen defenda ao goberno, porque está claro as diferenzas que temos, pero no seu momento estivo acompañando e acompañou, e eu creo que é igual de respectable que acompañe vostede, aínda que sexa afectada tamén directamente, creo que é exactamente igual de respectable. Igual de respectable é non ir porque algúns ao mellor traballamos e non podíamos ou o que fora. Esas cuestións hai que deixalas moi claras. Agora, despois do traballo que fixeron si depende de nós isto e en particular do goberno, evidentemente, pero nós tamén temos que facer a labor de presionar, igual que fixemos co centro de saúde, igual que fixemos aprobando a moción que presentou o Partido Socialista, calquera iniciativa que veña e que teña un obxectivo claro, e esta ten un obxectivo clarísimo: conseguir algo que despois de moitísimos anos, despois da discriminación que sufriu o colexio de Ventín durante moitísimos anos, agora se empeza a solucionar cunha petición masiva dos pais e das familias que levan alí aos seus rapaces e tamén cunha moción que vai a saír aprobada por unanimidade por todos os membros desta Corporación. Polo tanto, claro que hai outras formas de facer política, aquí hai que facela apoiando a quen hai que apoiar. Nada mais de momento.

Intervén, co permiso da presidencia, **José Miñones Conde**, que di: O primeiro que quero dicir e que sexan as primeiras palabras do grupo socialista é dar as grazas a toda a xente que esta hoxe aquí, pero sobre todo dar as grazas por esta iniciativa e por esta lección. Nós cremos que a reunión que tivemos onte, a última, é unha lección política para todos os que estabamos alí. Porque dende logo, se poden facer as cousas de moitas maneiras e mesmo hoxe aquí podemos politizar e falar de política, pero eu vou remitirme ao que se nos pediu e o que se pediu onte foi que non se fixera política, que non falemos de cores, e que esteamos coas familias. Polo tanto, eu non vou a entrar, aínda que podería dicir moitas cousas. Dende o primeiro momento, hai un ano e medio, nos reunimos coa ANPA de Ventín para intentar buscar unha solución ao tema do transporte. É mais, conseguimos daquela facer unha reunión co delegado de Transporte, na que estivo presente un representante da ANPA. Nesa reunión puidemos ver a realidade do proceso e a realidade do problema, que era que as empresas de transporte non querían, e polo tanto xa viamos onde estaba o cabalo de batalla que tiñamos que levar. Tivemos mais reunións a partir de entón, hai escasas semanas houbo a última na que a iniciativa que se nos plantexou a estaban levando as ANPAS en secreto, esa é a lección que deron, ao final a pena é, como lles dixemos, que saíu o tiro ao revés. Porque por levar como se teñen que levar as cousas, en secreto, para buscar unha solución, se atoparon con que a Xunta lles deu a espalda e aproveitaron precisamente ese silencio. Probablemente, se hai catro meses souberamos os políticos o que estaba a pasar, poderíamos ter feito moito mais, ruído cando menos, e nós así llo

transmitimos ás ANPAS, que foi unha mágoa e entendiamos perfectamente o porqué, polo que estaba en xogo. Precisamente se cada un de nós temos a capacidade de poñernos na súa situación, estaríamos aí sentados. Iso é o que temos que trasladar sempre á política, intentar abrir os ollos, que moitas veces é complicado e poñerse na pel da xente, é complicado pero é mais que viable. 723 familias, a min ponme a carne de galiña, a verdade. Ver que hai 723 familias que apoian esta iniciativa e polo tanto nós non podemos mais que dicir: adiante, tedes todo o noso apoio e podemos ir co apoio de traer aquí unha moción e instar e que se vexa dende a Xunta que hai unanimidade por parte da Corporación, pero iso non chega e por iso onte dicíamos que tiñamos que ir mais alá, e pedir esa reunión, e por iso instamos ao alcalde que pedira esa reunión co conselleiro na que esteamos presentes e que se vexa que hai forza e que hai realmente unha necesidade como di o texto. É unha necesidade xusta, é o xusto e o lóxico, non hai outra. Cando estabamos o outro día facendo a camiñata e nos mollamos, porque nos mollamos ben mollados, dicimos: isto é inviable se non é co transporte. Pero no facía falta facer a camiñata, xa sabiamos que era inviable, pero cando un a fai o vive, e cando un o vive lle chega mais. É lóxico o que se está a pedir e temos que ser quen de abrir os ollos á Xunta, neste caso á Consellería, para conseguilo. Ademais isto non só vai a permitir mellorar a calidade de vida das familias, senón que ademais vai en beneficio do concello, porque esa xornada vai a permitir despois que as escolas deportivas tamén medren, e que as actividades tamén medren, e que o concello no Milladoiro tamén medre, porque todo iso vai a dar vida e ademais está a inxustiza dese agravio comparativo con Bertamiráns, que eu entendo perfectamente que ás familias lles poda molestar. Polo tanto, nós, repito e reitero: grazas pola lección e tedes todo o noso apoio e hoxe o demostraremos aquí, pero teremos tamén que demostralo como di o señor Argibay, a partir de agora.

Intervén, co permiso da presidencia, **Bernardo Moar Míguez**, que di: Eu vou a empezar por felicitar, como non, á comunidade educativa e como non pode ser doutro xeito, á Corporación municipal, deixando as cousas políticas a un lado e ser capaces de vir aquí, de traer aquí un texto consensuado entre todos, que nos poda servir para apoiar ás familias, que creo que é ao fin e ao cabo o que todos queremos, o que todos buscabamos. A verdade é que sempre que me chama unha ANPA, sempre que me chama algún director dun colexio, sempre que me chama algún profesor, Bernardo sempre está detrás do telefono para collelo e atendelo e intentar resolver os problemas. Entón, francamente me sinto indignado que me chame floreiro. Vou a recordar soamente dúas cousas para facer un pouco de referencia e como ben dicía, creo que non é o momento de facer política, a política a facemos nos despachos, non cando acompañamos ás familias, pero si lle podo garantir que a fago detrás. Xa sei que a vostede lle parece que é todo cor de rosa e que aquí estamos rascándonos a barriga, seguro que si, seguro que si, dona Susana. Esa labor política a facemos e se mostra en moitos centros educativos e cando fai falta traer a alguén aquí, como demostramos mais dunha vez, o traemos e vemos os problemas que temos en cada centro educativo. Fai unhas semanas tivemos ao delegado territorial vendo os problemas de ampliación que temos no IES de Bertamiráns. Cada vez que necesitamos traer a alguén, movemos a alguén, e cada vez que necesitamos ir a algún despacho e reclamar algunhas cousas tamén o facemos. E non só eu, o alcalde tamén. Pero non lle vou a dar conta de todos os pasos que dou, como comprenderá, só faltaría. Aquí a rascarse á barriga non está ninguén e a facer de floreiro moito menos, moitísimo menos, de verdade que me parece indignante a súa actitude. Non vou a dicir nada mais. Enhoraboa á comunidade educativa e enhoraboa a case toda a Corporación municipal.

Intervén, co permiso da presidencia, **Susana Mallo Redondo**, que di: Señor Argibay, eu non lle vou contestar porque non entendín en que disentimos. Eu falo mais alto que el, diso non hai dúbida, pero non é un problema seu nin meu, somos así. Aparte diso, se en algo insistín neste caso é xustamente en que temos que facer política, aquí, e de aquí en adiante, nos despachos que faga falta. A miña intervención viña ao caso de que non nos tomáramos esta moción como un simple “*quedar ben*”, porque iso non é o que nos reclaman. É mais, para que reflexionemos todos, eu fun quen propuxen na asemblea de pais de Ventín que se lle reclamase intervención a esta Corporación municipal, e a reposta “de ambiente” naquela asemblea era ¿*para qué*? E niso hai que pensar, porque cando din “para que” non o están dicindo de Feijoo, que podían, estano dicindo de nós, e nós temos que demostrar que estamos para algo mais que asinar mocións, e que podemos facelo. E a miña crítica, xa continuando, tiña que ver co papel do concelleiro ata

agora, porque foi o único que interveu directamente neste tema, porque así se lle pediu e tiña que facelo. Por suposto non teño nada que dicir de como levan as cousas as familias, eu si sabía como as estaban levando, lévanas como consideran, solo faltaría, e como eles consideren sempre estará ben feito. Pero o papel do concelleiro é outro. É moi fácil dicir “vostede non sabe o que fago nos despachos”; mire, eu non sei o que fixo neste caso pero eu diría que nada. ¿Por qué? Porque levo anos en consellos escolares; levo o que levamos de goberno batendo con vostede en todos os temas educativos e estou chea de traerlle aquí a carballeira de Ventín, a inundación do pavillón, as obras que non se efectúan nos colexios, temas que se lle traen aquí e vostede pon, non o dubido nunca, unha cara estupenda de “estamos en elo”, pero nunca vexo que se fagan as cousas. En Educación nada, nada, e aquí díxennlle cousas concretas que puido facer, e aínda me dixo “está vostede enganada, si que as fixen”. Porque axilizar unha reunión con Oitavén para que non se botara o prazo enriba non o fixo, porque non a houbo; levantar a voz na reunión do outro día como autoridade local para dicir “si, temos que seguir falando diso, non podemos pechar a porta á negociación”, non o fixo. Non mo pode dicir porque sería mentira. Son cousas concretas as que me refiro e digo que ata agora, no que tiña que actuar este Concello non o fixo ben, e poño de exemplo o que non podemos facer a partir desta moción e estou segura que estamos de acordo, agora temos que levalo a efecto. Estou segura de que estamos de acordo porque o falamos antes coas ANPAS, se trata de traballar, de traballar en política, porque quedou demostrado que é un tema político. E mire, o de floreiro non o retiro. Excedínme na outra palabra porque non pensei naquel sentido que o dixo o alcalde, que ten razón por suposto, está totalmente fora de lugar. O que me refería é a eses obxectos que levas contigo cando paseas, cando vas a unha reunión, que poden mais ou menos decorar, pero que pouco mais uso teñen. E non o retiro porque non o dixeran por vostede, dixeran que non quero que actuemos como floreiros. Se vostede cree que llo estaba dicindo a vostede é o seu problema, eu dixeran que non podemos actuar como floreiros. E mire, persoas que actúan como floreiros todos os días, mire a infanta. Intervén **Emilio Martínez Carballeira** dicindo: ¿E que nos importa a nós a infanta?.

Intervén, co permiso da presidencia, **Ramón García Argibay** para dicir: Dona Susana, como lle dixeran antes, estando de acordo coa moción e co que estamos a escoitar e a facer. Disinto con vostede en moitas cousas e o sabe, non é a primeira vez que llo digo, fundamentalmente nas formas e sobre todo hoxe, nas formas, porque se pode facer unha crítica doutra maneira, pódese facer unha crítica dicindo que non traballan o suficiente, que non teñen a actitude ou aptitude suficiente, que estamos de acordo e o dixemos moitas veces. Non confundamos, unha cousa é a crítica e outra cousa é o que se dixo aquí, cuidado. Insisto, eu creo que hoxe non era o momento, é a miña opinión e podo estar equivocado como pode estar vostede ou non, hoxe non era o momento. Outra cousa: non sei vostede pero dende logo nós nunca nos tomamos unha moción para asinala simplemente; outra cousa é que o goberno o faga. Outra cousa é o que temos que facer, a política que temos que facer, o seguimento e esixirlle ao goberno que cumpra, ese é o noso obxectivo. O resto sobra neste caso e desde logo a nosa opción é exactamente o que dixemos na primeira intervención, enhoraboa á comunidade educativa, eu creo que fixeron as cousas in mellorablemente ben. Eu creo que non hai precedentes, nos 20 anos que levo vivindo en Ames, dunha actuación como esta, iso creo, ao mellor me equivoco. Agora mesmo, na historia recente creo que non hai precedentes, e ademais creo que é a forma axeitada porque hai que esgotar todas as vías antes de chegar a outras que ao mellor non son as mais axeitadas e está é a mais axeitada con diferenza. Nada mais.

Intervén, co permiso da presidencia, **José Miñones Conde** para dicir: Simplemente, sobre o tema do que estamos falar e por onde está indo o discurso, me gustaría escusar neste caso a Susana Mallo porque é parte, e como parte eu creo que se sente mais doída do que nos sentimos o resto. Intervén **Susana Mallo** dicindo: Se serve de algo, todos os presentes saben que eu apoio a xornada partida, polo tanto non son afectada neste sentido, pero pola falta de democracia de todo isto, si, por suposto. Eu non busco nada para os meus fillos, se

hai algunha dúbida. Intervén **Ramón García Argibay** dicindo: Non o dubida ninguén, polo menos nós non o dubidamos.

Continua **Jose Miñones** dicindo: Non vai por aí. Me centro principalmente na petición que se fixo dende nas ANPAS onte. Isto mesmo o podemos facer nós no apartado de rogos e preguntas. Nós pensamos que non é o momento de facelo simplemente quero deixar patente iso.

Intervén, co permiso da presidencia, **Bernardo Moar** dicindo: Vou aproveitar que teño aquí unha boa parte da comunidade educativa, para poder explicarme e para que vostede entenda tamén. Vou falar só un minuto, nada mais, da carballeira de Ventín. Iso leva meses contratado para facerse, o único que me pediu o señor que o vai a facer, que o fará durante unha fin de semana, é que deixara de chover 4 ou 5 días para que non se lle enterrara alí a plataforma, é o único que me pediu. Pregunta **Susana Mallo**: ¿Canto tempo levo eu pedindo que se interveña en Ventín? ¿Meses ou anos?. Contesta **Bernardo Moar**: Eu recórdolle que son concelleiro de Educación desde abril de 2012, por desgracia non antes. Intervén **Susana Mallo** dicindo: ¿E non gobernaba antes? Era o concelleiro do Milladoiro, por favor, Bernardo. Contesta **Bernardo Moar** dicindo: Era mais floreiro e mais mascota aínda que agora.

Intervén o **alcalde** dicindo: Dona Susana, vostede pediunos ler a moción e nós soubemos estar e lle deixamos, porque esta moción non é nin súa, nin deles, nin nosa, era da comunidade educativa. Vostede quixo lela e facer de voceira desta moción, e creo que fomos o suficientemente elegantes para deixala. Xa sei que retirou ese cualificativo, pero coincido co señor Miñones, que despois da reunión que tivemos onte, onde cada quen expuxo o que quixo, deberíamos de ir en outra liña e manifestar, independentemente de que cada un o manifeste dunha maneira ou doutra, manifestar ese respecto que debe de haber cara o traballo que fixo a comunidade educativa do Milladoiro. Contesta **Susana Mallo** dicindo: Eu non cuestionei iso e non lle permito que o diga. Vostede é o alcalde, pero non pode dicir calquera cousa. Continua o **alcalde** dicindo: Creo que está suficientemente falada esta moción. Grazas á Corporación e grazas á comunidade de Ventín. Pasamos a votar esta moción.

Previa ratificación de urxencia, por unanimidade dos seus membros presentes, e sometida a votación a moción presentada por urxencia, o pleno da corporación por unanimidade dos seus membros presentes presta aprobación á moción do teor literal seguinte:

"Hai catro meses, un grupo de pais e nais de Milladoiro iniciaron unha campaña de recollida de sinaturas sen precedentes para reclamar o seu dereito a votar no CEP de Ventín unha xornada continua, compatible cos horarios do resto de centros públicos desta poboación e cos mesmos servizos de transporte e complementarios que ata o de agora. Pero a pesar do aplastante apoio a esta iniciativa, que secundaron o 84,4% das familias con nenos en dito centro e o 90% das que teñen fillos escolarizados na EEI de Milladoiro, o 21 de febreiro a Consellería de Educación comunicou verbalmente aos representantes dos pais, do colexio e do concello, que non podían garantir unha xornada continua con servizo de autobús despois do horario lectivo e do comedor, unha das condicións que expresamente se solicitaban na citada campaña.

Tras consultar ás familias a súa opinión sobre a proposta da Administración, e unha vez constatado o seu rexeitamento a un horario que non satisfixera o interese da maioría, os pais acordaron en asemblea seguir adiante coa súa reclamación e facer ver á Xunta, empregando todas as vías ao seu alcance, que a petición plantexada inicialmente é lexítima e factible.

A proposta que puxo sobre a mesa a Xunta podería chegar a adaptarse á demanda inicial das familias se non fose porque só atende ás necesidades de transporte dunha parte das mesmas (os usuarios de comedor) e deixa sen autobús ao 40% restante dos nenos escolarizados en Ventín.

Tras anos negándoselle a este centro a posibilidade dun cambio de xornada pola negativa da Xunta a poñer autobús despois do comedor, as familias de Milladoiro non poden ocultar a súa sorpresa e desconcerto ao constatar que agora o transporte que Educación non pode garantir é o que recollería aos nenos ao finalizar a xornada lectiva, servizo que nunha antes se cuestionara.

Non entendemos cómo é posible que a Xunta alegue que non pode asumir a penalización económica por alterar o contrato de transporte para adaptarse ao que pedimos, pero sí estea disposta a iniciar un contencioso coa concesionaria se as familias aceptan un horario continuo con transporte despois do comedor. Este cambio no contrato sí parece economicamente asumible pola

Xunta, pero o que reclaman 723 familias de Milladoiro paradóxicamente non.

Todo elo lévanos a pensar que detrás da negativa da administración a informar favorablemente sobre a nosa demanda escóndese un problema de trasfondo político e económico. No caso concreto de Ventín, as familias con fillos escolarizados en Milladoiro entendemos que os nosos representantes na administración antepoñen o interese económico e empresarial ao servizo público aos cidadáns e por elo unha vez mais, séntense ninguneadas.

Somos as cincentas do concello de Ames. Nin sequera agora que, tras anos de reivindicacións, a Administración resolveu algunhas das grandes carencias educativas que arrastraba dende hai décadas esta poboación, os seus veciños poden celebralas. Polo contrario, podería darse a paradoxa de que a poucas semanas para que conclúa a ampliación e reforma estrutural de Ventín, colexio público de referencia de Milladoiro, este centro comece a perder alumnado de forma masiva ante a reticencia da Xunta a escoitar a opinión dos pais.

Agora máis que nunca esiximos o noso dereito como cidadáns a saber as causas reais que explican a negativa da Xunta a estudar sequera a nosa lexítima reclamación, e a coñecer os detalles e as cláusulas concretas da concesión de transporte escolar que leva anos impedindo ás familias de Ventín decidir sobre o horario dos seus fillos.

O feito de que o centro escolar referenciado, o único posible no Milladoiro, estea situado nunha zona alonxada do casco urbán, provoca un serio contratempo para todas as familias que temos fillos e fillas escolarizados no mesmo. A posibilidade de permitir que os nosos fillos se despracen andando ata o centro é inviable, tanto por infraestruturas como seguridade viaria; non se pode garantir a súa seguridade antes os múltiples problemas cos que se enfrontarían (beirarrúa estreita, falla de iluminación, orografía, etc.). Todo isto provoca que o transporte público sexa obrigatorio tanto para o desprazamento a primeira hora cara o centro, como o retorno ao remate da xornada única, así como despois do comedor, permitindo con elo a conciliación da vida familiar e laboral, á que as familias temos dereito, e á seguridade de desprazamento dos nosos fillos.

A demanda que maioritariamente solicitamos as familias de Ventín e Milladoiro está apoiada de forma unánime pola corporación municipal, e pro todo o exposto, esta, de forma unánime, acorda:

Primeiro.- Instar unha reunión urxente co conselleiro de Educación, D. Jesús Vázquez, para trasladarlle o apoio á demanda das 723 familias de Milladoiro que reivindicán o seu dereito a poder votar un horario continuo, estable e cos mesmos servizos complementarios e de transporte que na actualidade, acudindo na representación municipal o Alcalde e un representante de cada grupo municipal, así como dous concelleiros non adscritos.

Segundo.- Instar á Xunta de Galicia para que esta emita un informe favorable á proposta dun horario continuo e co servizo de autobús á entrada, á saída das clases e despois do comedor no CEP de Ventín.

Punto décimo segundo.- Rogos e Preguntas.

Rogos.

Intervén a concelleira **Pilar Candocia Pita** para formular os seguintes rogos:

Primeiro rogo.- Ao respecto dos arranxos que se fixeron nas beirarrúas, que se están facendo, gustárame que nos explicaran un pouco, rogo que nos expliquen como é o procedemento, porque non sei se hai alguén que esta vixiando como se fai esa obra. Para empezar, se poñen losetas novas e se deixan sen encintar algunhas, unhas se encintan e outras non, os obreiros se van, e non sei se van volver dentro de 3 semanas outra vez a encintar, é unha cousa un pouco estraña. E despois, hai losetas que se están poñendo por riba do peralte da beirarrúa, o que significa que unha persoa maior que arrastra os pés, ou

un neno pequeno, choca nelas e se cae. É dicir, se arrinca a loseta e queda mais alta que as losetas que están nos arredores, de maneira que quedan así, lle podo ensinar unha en fronte, ao lado da miña tenda, que choco con ela todos os días, porque eu tamén xa son bastante maior. As veces non podo levantar moito os pés, onte mesmo non os podía levantar. Entón, non é un caso Alfredo, son moitísimos casos. E despois, hai losetas que en lugar de quitar a loseta e reemprazala se lle esta botando un cacho. En todo caso, a xente está bastante escandalizada de como se está facendo esa obra, porque efectivamente, non esta quedando ben, Alfredo, non esta quedando ben. Eu agora ao saír se queres ensínoche onde están as losetas e como están quedando sen encintar. As novas que se poñen e as que están pegadas ao bordillo da beirarrúa e as quedan sen encintar; de aquí desta rúa eu controlo porque o vexo, pero tamén o vexo por outros lados que vou. Os obreiros se foron xa fai días, supoño que non van a vir a encintar dentro doutro pouco, entre outras cousas porque algunhas están encintadas e outras non, parece que depende de quen as fixera. O que me pregunto é se non hai alguén que estea levando o control desta obra, por enriba das persoas que as colocan; que unhas se colocan mellor e outras peor, iso pode pasar, pero se hai alguén que estea facendo traballo de control desa obra, que saibades que se está facendo mal. Creo que se esta facendo con un persoal que se contratou que se está pagando e esas horas non se recuperan. ¿Quen o está facendo, unha empresa?. Contesta o concelleiro de Vías, Obras, Parques, Xardíns, Patrimonio e Urbanismo **Alfredo Taboada Alvelo** dicindo: Si, hai dúas ou tres empresas contratadas.

Continua **Pilar Candocia** dicindo: Pois entón que arrinquen todo e o volvan a colocar porque non se esta facendo ben. Contesta **Alfredo Taboada** dicindo: A única obra que fixo a brigada foi onde está o Pazo da Peregrina, que estaban todas levantadas polos árbores. Pregunta **Pilar Candocia**: ¿E agora é unha empresa?. Contesta **Alfredo Taboada**: Si, son varias empresas, dependendo da zona que sexa. Intervén **Pilar Candocia** dicindo: Vale, hai diferentes empresas. Ademais non é só nunha zona, eu o teño constatado aquí porque o vexo todos os días pero tamén me chegaron queixas de alá arriba, cerca do centro médico. Intervén **Alfredo Taboada** dicindo: Por alí me parece que non, pero eu dígoche cales son as empresas que están contratadas. Continúa **Pilar Candocia**: Vale. En todo caso, a obra está indo mal en puntos diversos, que controledes porque hai iso.

Segundo rogo.- Pregunteille o outro día á concelleira Eugenia, quen se facía cargo da limpeza das beirarrúas da Grela e ela díxome que era a brigada. A cuestión é que hai veciños que aseguran e din que teñen testemuñas de que quen pasa é o camión de Urbaser, que rega o camión de Urbaser e que son os empregados de Urbaser, xa que levan a chaquetilla de Urbaser, os que están limpando. Nós queremos saber se A Grela está metida en zona urbana do Milladoiro ou se é como un núcleo rural mais. Por iso tamén nos gustaría coñecer o planning de limpeza das beirarrúas do rural, cando se vai e cada canto tempo se fai en cada sitio.

Terceiro rogo.- Outra cuestión é a respecto das hortas urbanas de Bertamiráns. Polo que eu sei, e non sei moito diso pero si o mínimo, o concepto das hortas urbanas trata de achegar o mundo urbano á agricultura, ao contacto coa terra, á ecoloxía, á vida saudable en definitiva. E atopámonos con que é un pouco incoherente que un proxecto deste tipo teña unha caseta que pon que leva amianto, teño unha foto, e que é perigoso estar alí dentro porque leva amianto, cando todos sabemos a estas alturas o que significa que haxa amianto. A min gustárame, e prego que se retire esa caseta se leva amianto e senón expliquen porqué ten alí un logo que di que está prohibido estar alí moito tempo porque está feita con amianto. Se é por unha cuestión de estética, poñan unha con 4 táboas, que ademais ata queda mellor no entorno, pero o que non ten ningún sentido é que haxa unha caseta que ten unha indicación de que hai perigo por amianto nunha horta urbana, que ten como obxectivo achegar conceptos totalmente diferentes de vida aos cidadáns.

Cuarto rogo.- Tamén rogarlles que nos contesten que pasou con aquela cuestión que plantexou o señor Argibay ao final do último pleno, sobre aqueles espazos que pedían os usuarios das clases de baile de salón e que demandaban sobre todo, que os recibira o alcalde, porque non os tiña recibido. Non sei o que pasou nesa reunión, pero o que eu sei é que eles agora alugaron un espazo nunha escola privada. Rogamos que nos expliquen que é o que aconteceu con esta situación, porque quedou ao final do pleno e vostede levantou o pleno e xa non soubemos mais nada e ata o día de hoxe tampouco se nos deu contestación, nin por escrito nin sen ser por

escrito.

Quinto rogo.- Outra cuestión que tamén quixera plantexar. Antes vimos un punto no que se trataba o problema das empresas de telefonía, que non se lles podía cobrar e que non había unha ordenanza para cobrarlles. O que eu quería saber era se había algunha contía que estaba nos orzamentos e que se pensaba que se ía a cobrar desas empresas e se iso aparecía ou non no Plan de Axuste como ingresos. Toma a palabra o interventor, **José Antonio Rueda de Valenzuela**, dicindo: Non. Este é un tema que levou a tesoureira e o informe é seu, pero sei que non está nas previsións de ingresos precisamente por ser unha cuestión tan controvertida. Pregunta **Pilar Candocia**: ¿E tampouco no Plan de Axuste? Contesta o **interventor** dicindo: Non. De todas maneiras, se me permite, o problema destas ordenanzas era que gravaban tamén non só aos titulares das redes, senón as persoas que pagaban unha peaxe aos titulares das redes por utilizalas. Hai dúas sentenzas: unha delas simplemente elimina esa parte do artigo. Se simplemente houbera esa sentenza a ordenanza tería subsistido. A outra o que e fai é eliminar o artigo completo, co cal elimina un elemento esencial do tributo.

Sexto rogo.- Unha ultima cuestión, porque non chegamos as preguntas no último pleno e hai moito tempo que está este tema. Se contestou nos medios pero non se nos contestou doutra maneira e tampouco houbo tempo de traelo aquí porque ás doce da noite xa entraran as preguntas e xa non daba tempo. Pregámoslles que nos dean conta de cantos nenos e nenas das escolas infantís están en situación de non poder pagar a escola, que foi algo que contestaron vostedes a unha petición que estaban facendo dunha nena que tiña ameazada a súa nai de que se non pagaba a escola, a ían botar fóra, iso está por escrito na carta que lle enviaron como moi ben nos medios de comunicación reflexaron. O que vostedes contestaron era que non tiñan intención de facer iso, pero o pago se está facendo, pagoulle a cidadanía porque se recolleron os cartos. Quero que conste en acta que a esa nena lle pagou a cidadanía porque se recolleron os cartos, e que non lle está pagando o concello. Lle pagou a cidadanía porque se está dicindo por aí o contrario e quero que conste en acta, por favor. A esa nena non lle resolveu o concello o problema, llo resolveron cidadáns anónimos, que deron cada un 1 céntimo e conseguiron que esa nena non fora botada da Escola. O alcalde dixo que o ía resolver, que estaba buscando solución, pregámoslle que nos diga como o resolveu porque o primeiro prazo xa o pagou e o segundo prazo é o día 5 de marzo e o vai a pagar outra vez, tamén cos mesmos cartos que xa deu a cidadanía. Queremos que nos explique como vai resolver e sobre todo, a min o que mais me alarma é que digan, como se non fose nada, que non llo poden resolver porque hai moitos mais nenos que están nesa situación. Se hai moitos mais nenos que están nesa situación, o concello está cometendo non sei se un delito, pero desde logo unha irregularidade, porque se están na situación na que está esa nena, teñen dereito á exención de taxas e se non se lle está aplicando a exención de taxas se está cando menos cometendo unha irregularidade.

Sétimo rogo.- Outra cousa que quero pregar é que haxa unha coordinación axeitada entre os Servizos Sociais e as direccións das escolas para que nunca, nunca, nunca, nunca mais en Ames, Cáritas ou calquera outra entidade social pague taxas de escola infantil cando as familias teñen dereito á exención da taxa. Porque se eu son director ou directora dunha escola e vexo que Cáritas lle ven a pagar a factura a unha persoa, teño que ver que é o que pasa e cando menos teño que dar alerta aos concelleiros e a Servizos Sociais para que vexan que está pasando, e vexan cal é o motivo polo que Cáritas lle ten que pagar a esa familia cando existe unha exención por parte do Concello. En todo caso, o mais grave deste asunto é que o Goberno diga como se nada que hai moitos mais nenos neste caso e sería un agravio comparativo resolverllo a esa familia e ao resto non. Se hai mais nenos nós queremos saber e pregamos que nos dean os datos de cantos nenos están nesa situación e porqué non se lle está dando información ás familias de se teñen dereito a exención, porque a teñen, e as escolas infantís teñen dereito a cambiar a taxa polo medio do curso se lle cambiou a súa situación a familia.

Oitavo rogo.- Pregamos tamén que se fagan as modificacións que sexan precisas nos regulamentos, tanto das escolas como dos servizos, para que quede claro cando hai que convocar a comisión e que sempre que se tome a decisión de que se ten dereito á exención sempre sexa con efecto retroactivo na data en que se solicita. Se un usuario solicita a exención en setembro, que é cando lle cambiou a situación económica e a comisión non se reúne ata maio é evidente que deixamos pasar o tempo e pagou todo o ano, aínda que non puidera pagar e aínda que tivera dereito a exención. No regulamento ten que quedar claro e nós propoñémolo porque ademais agora é o momento no que se van a ver os regulamentos, que se modifiquen nese sentido e que quede clarísimo cando se ten que reunir a comisión, e sempre que hai un usuario de escola infantil ou de calquera servizo, que está pedindo revisión de taxas á que ten dereito segundo a ordenanza pola que se regula. Polo momento nada máis.

Intervén a concelleira **Susana Mallo Redondo** para formular os seguintes rogos:

Noveno rogo.- En primeiro lugar quería rogar que se retomen as obras de acondicionamento da rúa Anxeriz, porque o cruce foi solucionado pero o resto da rúa segue como se fora un campo de minas. Sinto ser tan explícita, eu son así. Vostedes chámanse corruptos entre vostedes así con palabras finas e eu non podo ser explícita nas miñas cousas, pero é así. É que estou un pouco sorprendida porque eu son unha persoa moi directa e ás veces excesiva e vostedes están escandalizados porque digo cousas que creo, argumento e digo e despois estou oíndo aquí tódolos días barbaridades que se soltan, entre Pimpinela, empezando por aí, logo que se o goberno do PSOE de antes e logo se o goberno de agora. Perdón, este non é o tema, pero é que claro, acabo de dicir isto de que parece un campo de minas e xa dubidei se ao mellor era excesivo. Pasen por Anxeriz, por favor, déanse unha volta no coche de ser posible.

Décimo rogo.- Rogo tamén que se nos dea a data aproximada en que se vai a amañar por completo a carballeira de Ventín, é dicir, non só cortar as árbores, senón tamén instalar un novo sistema de rego e solucionar os problemas que ten o aboamento e demais traballos, porque son moitos os que fan falta na carballeira.

Décimo primeiro rogo.- Rogo tamén as datas aproximadas da intervención no pavillón e cales van a ser as intervencións exactas que se van facer.

Décimo segundo rogo.- Rogo tamén que se acometa o asfaltado da Travesía do Porto á altura do colexio, porque está esfarelado. "Esfarelado" é unha palabra suavísima que quere dicir que se desfai. Intervén o concelleiro de Vías, Obras, Parques, Xardíns, Patrimonio e Urbanismo **Alfredo Taboada Alvelo** dicindo: Eu xa tomei nota e tan pronto poidan o van a levantar, non hai problema ningún.

Décimo terceiro rogo.- Pido tamén por favor, que igual que no seu momento por solicitude nosa, se nos deu a lista dos amaños que os colexios querían que se fixeran para principios de curso, fíxose unha lista porque vostedes a demandaron ao final do curso pasado do que cada un quería que se amañase. Pido por favor, que se nos volva a entregar esa lista pero co que se amaño, non sei se é de Obras ou de Educación, de quen sexa.

Décimo cuarto rogo.- Pido tamén diálogo, por favor, con estes veciños que levantaban carteis, que hoxe son pouquiños, fóronse os do Milladoiro pero están aquí os da rúa Agrelo, que son os das fotos. A estes veciños estanos mareando, de novo, eles teñen un problema terrible de inundacións, un problema que os fai incluso non poder respirar nos pisos mais altos dos edificios, xa non digo nos baixos digo nos dúplex incluso, e con ese problema foron á construtora, que os remitiu a que era un problema de acometida do concello e o concello mandounos de novo á construtora. Vamos a ver: se o concello non ten a responsabilidade, se ese é o caso, que foi o que argumentou na súa resposta o señor alcalde, eu creo que si pode facer un traballo de diálogo, de sentarse con eles, de explicarlles ben porqué non é cuestión do concello, ou escoitalos a eles, porque tamén teñen argumentos en contra diso. Eu creo que non se pode resolver cun papel que se lles envía porque así van a estar de man en man continuamente. Hai que reunirse con eles, hai que falar ese problema que é de habitabilidade e de saúde, e intentar darlles unha solución, sexa directa do concello sexa mediando. Non teño mais rogos.

Intervén a concelleira **Isabel González Cancela** para formular os seguintes rogos:

Décimo quinto rogo.- Os veciños de Ortoño nos din que se vaian a mirar as árbores que están no campo da igrexa porque aparte de podalos deben de ter algunha enfermidade porque se están pudrindo. Intervén **Alfredo Taboada** dicindo: Pero eses son da igrexa, me parece. Pregunta **Isabel González**: ¿Os que están alí no campo da festa?. Intervén **Alfredo Taboada** dicindo: Non sei, pero eu cóntoche o que me pasou alí. Había un que estaba medio pachucho, tiña perigo e cortámolo e se levou e despois houbo que devolvolo. Entón eu dixeran: que o pode quen queira. Non sei, haberá que mirar se son do concello, mirareino.

Décimo

2. **sexto rogo.-** Diante do colexio Agro do Muíño volve a estar outra vez mal, habería que arranxalo. Tamén a sinal que está á primeira hora da mañá para que non se crucen os coches moitas veces está tirada ou senón é un folio, co cal coas chuvias desaparece. Ao mellor habería que poñela doutra maneira, que non sexa un folio. Está nun poste e pegado hai un folio.

Décimo sétimo rogo.- No lavadouro da fonte que hai alí, onde vai a xente a recoller a auga, que se limpe. Contesta **Alfredo Taboada** dicindo: Límpase practicamente cada semana, o que pasa é que a limpas agora e á media hora xa esta outra vez

Décimo oitavo rogo.- Neste rogo que me axude Pilar, porque estabamos xuntas cando nolo dixeran os veciños de Covas. Onde está a ponte da autovía, cando chove a auga baixa por alí e pasa por enriba. Ao parecer xa viñeron os da Xunta a vela, pero non se lle deu ningunha solución, entón a ver se hai unha solución. Contesta **Alfredo Taboada** dicindo: Hai unha solución pendente pero faltan as firmas dos propietarios da finca esa, que son moitos, agora creo que nos faltan 10. Intervén **Pilar Candocia** dicindo: Se me permitides, nese caso o que hai que facer Alfredo é falar con eles, porque eles din que hai unha solución sen esperar polos terreos, din que a auga leva as pedras. Intervén **Alfredo Taboada** dicindo: ¿Como falas se non os das encontrado? Intervén o **alcalde** dicindo: Se falou con varios, cuns que vivían en Brión. Di **Alfredo Taboada**: O que hai que facer é un canal, iso é o que estaba programado, un canal para que recolla todo, senón non recolle, limpas agora e volve a atascarse.

Intervén o concelleiro **Francisco Villaverde Marcos** para formular o seguinte rogo:

Décimo noveno rogo.- En nome de varios veciños da zona de Condomiña, propietarios de fincas da Condomiña, pídolle ao Concello que solicite a Augas de Galicia que faga unha revisión, porque o río está levando toda a terra das fincas. Eles non poden actuar aí de ningún xeito, entón que o faga Augas de Galicia dalgunha maneira. Teño aquí incluso fotos.

Intervén o concelleiro **José Manuel Miñones Conde** para formular os seguintes rogos:

Vixésimo rogo.- Este rogo vai referido á páxina web, para que actualicen a información referente aos grupos municipais, que está sen actualizar dende a marcha de Patricia Conde, que segue aparecendo. Despois, e sobre todo, que se colguen as actas dos plenos, xa que dende o 2010 non aparece nada, entón que se colguen as actas dos plenos de 2011, 2012 e 2013, é dicir, dos últimos 3 anos.

Vixésimo primeiro rogo.- Nos solicitan os de JUPEMI a necesidade de poñer en marcha os dous equipos informáticos que teñen alí para conectarse a Internet e como o concello ten a asistencia técnica dun técnico informático, rogaríamos que se enviase alí simplemente para configurar os equipos para a conexión a Internet. Non ten custo para o concello e simplemente sería configurar eses equipos.

Vixésimo segundo rogo.- Nos comunican dende o club do Bertamiráns, acerca do campo de fútbol, sobre a posibilidade de que se faga unha actuación mais en profundidade sobre o desague, que cando chove inunda o campo. Cando a auga chega ao lateral, resulta que

está todo taponado e cheo de terra polas obras precisamente que están facendo, entón volve para dentro a auga. Rogo que se limpe esa canalización que esta xusto na beira, na parte de atrás, onde vai a estrada.

Vixésimo terceiro rogo.- O último rogo é sobre a zona de aparcamento que se fixo onde a Garda Civil e a Escola Infantil, que se asfaltou toda esa zona, pero xusto onde aparcan os coches, que é nese lateral, nesa cuneta, está sen ningún tipo de firme e ademais é terra. Que pódase ampliar con algún tipo de firme porque precisamente onde temos os aparcamentos se pode habilitar para iso.

Intervén o concelleiro **Ramón García Argibay** para formular os seguintes rogos:

Vixésimo cuarto rogo.- Rogo que nos dean información sobre o tema da canceira e a recollida dos cans que se fai, a ver como vai o tema porque xa o falamos no seu momento nun ou en dous plenos.

Vixésimo quinto rogo.- Tamén lle rogo por enésima vez, porque tamén non sei cantas veces fixemos ese rogo, que nos contesten que pasou coas pagas extras que os concelleiros María, Manuel e mais eu, no seu momento, decidimos renunciar a ela en solidariedade cos traballadores e presentamos un escrito por rexistro fai mais dun ano, que a nosa vontade era que fose destinada a unha serie de asociacións sen animo de lucro. Aínda está sen contestar un ano despois.

Vixésimo sexto rogo.- Tamén lle rogo que nos informe se van a facer esa recepción parcial na Urbanización de Raíces ou non, porque xa levamos meses preguntando por este tema e os veciños aínda non saben nada.

Vixésimo sétimo rogo.- Tamén lle rogo que na pista que vai desde á igrexa de Biduido, que é ese atallo que vai a dar case ata onde está a farmacia, hai trece farolas sen luz dende xa fai trece meses, non sei se trece meses pero seis ou sete seguro. Hai tres casas nada mais, xa sei que só son tres pero teñen o mesmo dereito que o resto de casas da zona e llo dixemos moitísimas veces a ver se poden pasar por alí para reparar aquilo. Contesta **Alfredo Taboada** dicindo: Están sen cable, que o roubaron. Vaise poñer un novo de aluminio.

Vixésimo oitavo rogo.- Tamén lle rogo que non tarden tanto tempo en poñer a marquesiña de Lens como da outra vez, porque sabemos que foi roubada pero aínda segue sen repoñer. Claro, o mellor para que non a rouben é non poñela. Contesta **Alfredo Taboada** dicindo: Váiselle poñer, non te preocupes e esa non a van levar. Váiselle poñer algunha cousa para que non a leven.

Vixésimo noveno rogo.- En torno á piscina de Bertamiráns hai unhas urbanizacións onde teñen unha serie de buratos - piscinas, non só está a piscina da Telleira senón un poquiño mais adiante hai unha piscina en forma de baches, que xa levan tamén meses intentando ver se se pode facer algo con ese tema. Pregunta **Alfredo Taboada**: ¿Nunha urbanización moi pequena despois da Telleira para arriba? Intervén **Pilar Candocia** dicindo: Xa as arranxastes uns días antes dun pleno, non hai nin 3 meses que están arranxadas e volve a haber unhas fochancas de 50 centímetros. Continua **Ramón García Argibay** dicindo: Tamén nese entorno que teñan un pouquiño mais de consideración con ese tema, máis cariño en canto á limpeza viaria e todo iso.

Trixésimo rogo.- Outro rogo vai encamiñado a que o día 10 de febreiro presentamos un escrito por segunda vez, onde pediamos aceso e copia de todos os informes de Intervención e Tesouraría emitidos dende a data de aprobación do Plan de Axuste. Tamén pedimos aceso e copia de todos os informes de reparo e de desconformidade emitidos pola Intervención. Tamén pedimos aceso e copia de todos os levantamentos de reparo realizados pola Alcaldía. Esta é a segunda vez que presentamos este escrito e seguimos sen contestación. O mesmo pedimos para que nos dean aceso e copia da relación de facturas da Sociedade Estatal de Correos e Telégrafos correspondente aos anos 2011, 2012 e 2013 onde figure polo menos a data da presentación da factura, pagamento e importe pagado ou importe pendente de pago.

Trixésimo primeiro rogo.- Na zona de Alca e tamén cara ao Agro do Muíño hai unha serie de sinais tumbadas, polos temporais supoño. Me consta que estaban intentado repoñelas, pero llo

digo por se acaso, mais que nada para que saiban mais ou menos a zona onde están, me consta que están repoñendo.

Intervén o concelleiro don **Emilio Martínez Carballeira** para formular o seguinte rogo.

Trixésimo segundo rogo.- Boas noites a todos. Antes de empezar co rogo que lle vou a expoñer señor alcalde, de todo canto poida dicir neste rogo non quero que para nada o tome como unha ofensa persoal nin moito menos. Llo digo tanto ao alcalde como a algún dos concelleiros que vou a citar. A mediados de xaneiro, un colectivo de veciños do noso concello e de distintas parroquias, que tiñan dende o mes de setembro permiso de vostede concedido e por escrito para poder utilizar a Casa da Cultura e levar a cabo unha actividade de baile, se ven sorprendidos cando o conserxe deste centro recibe unha chamada telefónica da súa concelleira de Cultura dona Eugenia Martín Vicente, onde lle comunica que estes veciños non poden facer uso deste centro, sen dar explicación algunha. Rógolle, lle pido, e lle esixo que nos dean unha explicación de porqué se actuou desta maneira a última hora e despois de estar todos estes pensando que podían dispoñer do centro e non se lle deu ningunha explicación nin se lles avisou con tempo. As preguntas que moitos se fixeron, me fixen e nos fixemos, foron as seguintes: ¿Quen é o alcalde? ¿É vostede ou é a concelleira? ¿A quen lle temos que facer caso, a vostede ou a ela? ¿Quen é esta señora para desautorizar ao alcalde? Conforme actuou neste caso, ¿quen di que non o poida facer con outras cousas? Vostede volve a demostrar unha vez mais que non é alcalde nin farrapos de gaitas, vostede está manipulado e mangoneado por esta señora, como estivo sempre, que é a que lle marca o ritmo e os tempos.

Intervén o **alcalde** dicindo: Perdón, se me permite unha cousa don Emilio. Xa sei que vostede fixo un comentario antes de empezar, que non lle tomara a mal o que ía dicir, pero eu entendo que non podo deixar pasar por alto o que está a dicir, máxime cando estamos no apartado de rogos.

Intervén **Emilio Martínez** dicindo: É un rogo que lle estou facendo, é a exposición do rogo e estou no uso da palabra. Intervén o **alcalde** dicindo: Lle pedín permiso para poder intervir, vostede mo dou. Solo lle quero dicir iso, nada máis, porque non vale todo, non se pode dicir calquera cousa.

Continua **Emilio Martínez** dicindo: De acordo, pero é a pura realidade. Vostedes unha vez mais lle están tomando o pelo aos nosos veciños, faltándolles ao respecto, vacilándoo e xogando con eles. Parece mentira, amiga Carmen, que ti poidas consentir estes atropellos que fan en Bertamiráns. Sabes ben que de estar no goberno, como é o teu caso, e sorte tiveron non haber estado eu alí, porque contando co permiso do alcalde xa pode chamar María de la O que, ou si, ou si, e baixo a miña responsabilidade, estes veciños ían a utilizar o centro. Aínda por encima, eran eles quen lle pagaban aos monitores. Iso que vos quede moi claro polo que poida pasar no sucesivo, tanto vostede como a súa concelleira. Quixera recordaros o que se criticou ao anterior alcalde desta Corporación cando non deixou local algún no noso concello para levar a cabo o I Curso de Outono Gerardo Fernández Albor e tivemos que organizalo en Brión, e agora vós estades facendo outro tanto do mesmo, o que hai que predicar é co exemplo e non tirar a pedra e esconder a man. Rógolle que cambien de proceder, aínda que sexa tarde, se perdoa pero non se esquece, a ver con que cara ides xunto destes veciños cando os necesitedes.

O día 8 de febreiro entra unha solicitude no rexistro de entrada do noso Concello onde di: Dona Isabel Barreiro Seijas e dona Saladina Silva Vilanova, con domicilio na Condomiña, Ortoño, como representantes do grupo de baile de maiores que se celebra todos os domingos pola tarde no centro sociocultural de Bertamiráns, expoñen que: Primeiro: Temos coñecemento da denegación do permiso solicitado do centro sociocultural do baile de maiores o vindeiro 14 de febreiro. Tamén se nos informou de que os días 16 e 23 de febreiro suspenderase o baile de maiores por impartirse actividades do concello. Por todo o anterior solicitamos: 1.- Se nos comunique por escrito o motivo da denegación do primeiro punto exposto anteriormente, xa que a pretensión que temos todos os membros do grupo de baile

é facer unha comida con motivo do día de San Valentín e a continuación o baile. 2.- Se nos comunique por escrito o motivo da suspensión de dita actividade durante os días 16 e 23 de febreiro, posto que é unha actividade programada dende hai moito tempo que supoñemos que ten prioridade ante outras actividades. 3.- Se atenda a nosa solicitude e teña a ben revisar e conceder a nosa petición para o día 14, así como manter a actividade dos días 16 e 23 de febreiro. Por todo iso, acompañamos escrito coa firma dos participantes de bailes de maiores. Esta é unha solicitude que presentaron estes dous veciños avalada con mais de 70 firmas. Están esperando pola resposta ao día de hoxe; hoxe é día 27 e isto era para o día 14.

Intervén **Mª Carmen Verde Leboráns**, que di: Emilio, se lle contestou a quen está autorizada para facer o baile. Di **Emilio Martínez** : ¿A quen se lle contestou Carmen? A día de hoxe non recibiron ningunha contestación, non sexades mentireiros aínda por riba. Contesta **Carmen Verde**: A Rosa, que é a encargada. Intervén **Emilio Martínez** dicindo: Rosa non fixo esta solicitude, quen fixeron esta solicitude foron dona Isabel Barreiro Seijas e dona Saladina Silva Vilanova, estas son as que tiñan que recibir a reposta. Contesta **Carmen Verde**: Emilio, o baile haino dende marzo do ano pasado. Contesta **Emilio Martínez** dicindo: Iso é demagogia, estes señores piden unha explicación que vós lle tendes que dar, e aínda o están esperando, non se lle contestou nin a estas dúas señoras nin aos 70 veciños que están avalando esta petición. Intervén **Carmen Verde** dicindo: Eu a ti nunca te vin alí no baile, perdoa. Contesta **Emilio Martínez**: Ti ben sabes que a min me gusta bailar Carmen e non é a primeira vez que bailamos ti e mais eu. Intervén **Carmen Verde** dicindo: Vamos a ver Emilio, se había outras actividades non pode haber baile. Contesta **Emilio Martínez**: Carmen, estas explicacións téndenllas que dar por escrito a quen volo solicita. Contesta **Carmen Verde**: Sábeno de sobra. Contesta **Emilio Martínez**: Non o saben, non.

Intervén **Pilar Candocia** dicindo: Se vai por escrito ten que ser contestado por escrito. Intervén **Carmen Verde** dicindo: Terá que contestalo o alcalde, vai dirixido ao alcalde, non a min. Intervén **Emilio Martínez** dicindo: A min gústame bailar e que saibas que o fago bastante ben. Contesta **Carmen Verde**: Emilio, diso dou fe, que bailas ben. Continúa **Emilio Martínez** dicindo: O rogo é en base a esta solicitude. Os veciños de Bertamiráns que van á actividade de baile á Casa da Cultura de Bertamiráns solicitaron este centro para poder bailar o día 14 de febreiro a partir das 9 da noite, solicitude avalada por mais de 70 veciños e a día de hoxe aínda están esperando resposta. Comprobase que este local para este día e a partir desa hora nin estaba reservado nin ocupado. Quixera, lle rogo e lle esixo, que tanto vostede coma a súa concelleira de Cultura dean aquí unha explicación pública de porqué se lles denegou esta petición e porqué non se lles contestou en tempo e forma como estes así o fixeron. Señor alcalde, díxenlle en mais dunha ocasión que cos nenos e cos maiores non se xoga. Parece mentira que como xove que é, e cunha familia como temos e como tes, non teñas outra sensibilidade, corazón e respecto e non sexades capaces de escoitalos. Non me interrompades, porque eu a vós non vos interrompo.

Intervén **Carmen Fraga Crespo** dicindo: É que nos fai gracia, Emilio, perdoa.

Continua **Emilio Martínez** dicindo: Pois a min non me fai gracia ningunha, porque a min o que mais me molesta é que xoguen cos vellos, e que non sexan capaces de ser mais comunicativos e cercanos con este colectivo tan importante para todos nós, que nunca nada nos piden para todo o que merecen e tanto que nos dan, e que se lles denegue un permiso para facer uso dun local do concello durante 2 horas. ¡Hai que ser ben pordioseros! Temos que pensar que a ancianidade é unha situación que a todos nos vai chegar e que a ningún de nos gustaría que nos fixeran outro tanto do mesmo aos nosos maiores ou a nós mesmos o día de mañá, como vostedes están a facer con estes. Quixera dicirlle á súa concelleira de Cultura ¿quen se cre que é? Me parece que se cree a reina do mambo, fai e desfai o que lle sae das narices, así como prancha un ovo é capaz de fritir unha camisa. É unha auténtica fenómeno. Se atreve a faltarlle ao respecto aos nosos maiores, mentirlles, tomar represalias, xogar con eles e desautorizar ao alcalde. Creo que os veciños de Ames non se merecen este tipo de comportamentos e menos este goberno, onde día tras día nos demostra que é unha barca á deriva. Dentro dos que aquí estamos e que non me poderán deixar mentir algún dos presentes, a súa concelleira dona Eugenia Martín nos dixo nunha ocasión que se chegaba a morder a lingua, morría polo veneno que tiña. Ante isto, ¿qué podemos esperar? Os feitos e acontecementos que están a pasar están aí e vostede non foi quen nin é capaz de poñer remedio a todo isto que está a pasar, única e exclusivamente por deixarse levar por quen non debe. Os maiores o que necesitan é respecto, cariño, atención, cercanía, boa

disposición, excursións, centros de saúde como Deus manda e non como teñen os do Milladoiro, centros adaptados ás súas necesidades, centros de día como teñen outros concellos moito mais pequenos ca o noso, parques de maiores que permitan realizar exercicios físicos, reforzados con complementos adaptados, tan demandados por eles e onde este concelleiro de Pacto x Ames llo planteou varias veces neste consistorio e non o que están vostedes a facer. E por ultimo vou citar outra vez á compañeira e amiga Carmen. Mira Carmen: créeme que sempre te respecte, sempre me levei ben contigo e sempre fomos bos amigos e compañeiros de Corporación. Contesta **Carmen Verde**: E seguimos sendo amigos. Continua **Emilio Martínez Carballeira**: Quero que me escoites o que che vou a dicir, non podes nin debes permitir sendo como es de Bertamiráns e *membra* do equipo do goberno, que veñan a insultar aos nosos veciños desta maneira e con esta forma de proceder dos teus compañeiros.

Rógolle alcalde que pense e recapacite. Con ese tipo de actuacións, señor alcalde, quen ten que coller o toro polos cornos sabe ben quen é: vostede, nin mais nin menos. Que saiban os veciños que igual pode pasar por enriba de min e pode tomar as represalias que considere, pero cos meus veciños non llo vou a admitir, nin a vostede, nin á concelleira nin a ninguén. Iso téñao moi claro. E en solidariedade con todos estes veciños, que para min foron enganados, por faltarlles ao respecto e tomarlles o pelo dunha forma tan miserable como vostedes o fixeron, boas noites e abandono o pleno.

Intervén o **alcalde** para dicir: Non lle vou permitir que utilice a palabra represalias, como deixando caer que aquí se utilizan represalias. Cre o ladrón que todos son da súa condición.

Neste momento da sesión abandonan o pleno os/as concelleiros/as non adscritos/as Emilio Martínez Carballeira, Ramón García Argibay, M^a Dolores Fernández Álvarez, Manuel J. Ferreiro Santiago, Alfonso Rey López e María González Gómez.

Preguntas.

Intervén a concelleira **Olalla Alvite del Río** para formular as seguintes preguntas:

Primeira pregunta.- Eu quería preguntar se a praza da Canela, onde está a floristería Carmiña, ¿é municipal ou é privada? Non sei se é do Concello. Contesta **Alfredo Taboada**: É privada. Continua **Olalla Alvite** dicindo: Era o que me temía, da asco do sucia que está. Moitos locais están pechados, pero aínda así, ¿o Concello non podería instar ou facer algo para que se limpe?.

Intervén **Francisco Doval Galán** dicindo: É que antes os locais mantiñan polo menos a beirarrúa de enfronte limpa. Intervén o **alcalde** dicindo: Esa praza é privada de uso público, creo recordar. Ven de moito atrás, creo que no seu momento se entregou ao Concello pero despois os propietarios plantexaron un contencioso, xa hai moitos anos. Intervén **José Francisco Doval** dicindo: É privada de uso público, iso é un problema en Bertamiráns, a metade das beirarrúas de Bertamiráns son privadas de uso público. Contesta **Alfredo Taboada**: Iso pasa en todos os lados, pero se ten un uso público non son privadas.

Segunda pregunta.- Agora teño unha pregunta para Bernardo Moar, como concelleiro de Comercio. Queríalle preguntar quen se encargou de encargar e mercar os regalos que se deron na campaña do Rasca de Nadal. ¿Pódeme contestar?. Contesta **Bernardo Moar**: Contestareille por escrito. Intervén **Olalla Alvite** dicindo: Non, por escrito xa me ías contestar hai dous meses a cousas e aínda estou esperando.

Intervén o **alcalde**: Non, non é certo. Di **Olalla Alvite del Río**: ¿Qué non é certo? Pregunto se hai algún comercio que estea esperando que se lle paguen os vales de hai dous anos do Entroido. Pregunta o **alcalde**: ¿E non se lle contestou nin por escrito nin verbalmente neste pleno?. Di **Olalla Alvite del Río** : Non, e creo que xa hai 3 meses. Contesta **Bernardo Moar**: En Intervención non hai constancia. Do que si hai constancia é de que non se usaron

todos os vales pero non de que estean sen pagar. Aquí non chegaron todos, alguén non usou os vales de compra, pero que estiveran presentados e non se pagaran non hai constancia.

Pregunta **Olalla Alvite**: ¿E o do *merchandising* non mo podes contestar? É moi fácil. Contesta **Bernardo Moar**: Non, contestareille por escrito. Non recordo o nome. Pregunta **Olalla Alvite**: ¿Non se acorda? ¿Quen se encargou?. Contesta **Bernardo Moar Míguez**: ¿Quen se encargou de comprar? Encargouse o Concello. Pregunta **Olalla Alvite**: ¿E mercoullo a unha empresa de Ames ou de fóra?. Contesta **Bernardo**: De fóra. Di **Olalla Alvite del Río**: Boa maneira de fomentar o comercio en Ames.

Intervén a concelleira **Pilar Candocia Pita** para formular as seguintes preguntas:

Terceira pregunta.- Creo que hai polo menos 3 meses alcalde, porque nos últimos plenos xa non chegamos á quenda de preguntas, que vostede me dixera que esa mesma semana se ía poñer a marquesiña onde está a antiga churrería Alba, non sei agora como se chama. Hai parada dun bus dun lado e do outro non, e falamos que no momento en que se puxera a marquesiña xa ía haber parada de bus tamén aí. Eu quedei coa xente en que vostede me contestara iso, porque se estaban organizando para recoller sinaturas, porque o que non ten sentido é que haxa parada do bus dun lado e do outro non, cando hai espazo para poñer unha marquesiña alí, e mentres non haxa marquesiña o autobús non fai a parada. Hai moitos rapaces da zona das urbanizacións de arriba que cruzan por aí, que van a coller o autobús para ir a Santiago ás facultades e aos institutos, porque hai especialidades que aquí non hai, como a de bacharelato artístico e outras e teñen que ir ao instituto e cruzan por aí. Teñen parada para deixalos pero non teñen para ir para alá, teñen que ir alá arriba ou vir ata aquí abaixo. Non ten sentido habendo un espazo e se hai parada habilitada dun lado o normal é que a haxa tamén do outro. E non só a xente que ven de arriba, tamén a xente dese espazo da estrada, non ten ningún sentido. Como estaban organizando unha campaña de recollida de sinaturas e vostede dixo iso, eu dinlles a palabra de que vostede o ía resolver nuns días, entón non teño porque quedar eu mal.

Intervén o **alcalde** dicindo: Ten razón dona Pilar. Eu pido desculpas. A mágoa foi que non mo recordara porque algún problema debeu de haber. Contesta **Pilar Candocia** dicindo: É que non chegamos ás preguntas. Continua o **alcalde**: Xa, pero así como me chama para outras cousas ou nos vemos na rúa, podía dicirme que non me esquecera diso. Contesta **Pilar Candocia** : É que eu tampouco me acordo todos os días. Continua o **alcalde** dicindo: Quero dicir que moitas veces podemos comentar as cousas, para non atrasar, para que non teñan que esperar tres meses. Intervén **Pilar Candocia**: Non te preocupes, que che mandarei un WhatsApp por día, pola mañá.

Intervén a concelleira do grupo municipal socialista **Isabel González Cancela** para formular as seguintes preguntas:

Cuarta pregunta.- Eu voulle preguntar a Carmen un pouco o que xa lle preguntou Emilio. Eu creo que o problema é que hai que organizar os bailes, ou se fan ou non se fan, da igual que os faga Rosa. Intervén **Carmen Verde** dicindo: A encargada é Rosa, que foi ela a que pediu o permiso.

Continua **Isabel González Cancela** dicindo: O Concello algo ten que dicir. E hai que contestar os escritos, é dicir, non contestarlle a Rosa, porque non sei se Rosa fixo algún escrito a maiores ou non, non o sei, pero eses veciños si que pediron unha explicación e creo que se lles pode dar. Sobre a Casa da Cultura, xa sabemos que hai moitos actos e moitas actividades pero podemos compatibilizar, por exemplo un dos días o acto que había era o de Germán, e ás 19:30 estábamos fóra e eles pedían a partir das 21:00. Non se lles deu porque non se quixo. Intervén **Carmen Verde** dicindo: Non, pedían o día dos namorados. Intervén o **alcalde** dicindo: Pero o baile non o fan a partir das 21:00, Isabel.

Intervén a concelleira de Medio Ambiente, Sanidade, Cultura, Deportes e Benestar Social **Eugenia Martín Vicente** dicindo: Ellos tenían reservada la Casa de la Cultura hasta más tarde, luego terminaríais antes, eso por una parte. Y por otra parte, yo no he ido nunca, pero tengo entendido que el baile empieza antes. Intervén **Isabel González** dicindo: Pero eles axustábanse, eles estaban dispostos se llo dicíades, o que non se pode é dicir “non”. Intervén **Pilar Candocia** dicindo: A nós tampouco ninguén nos chamou para dicirmos que axustáramos o horario. Intervén **Isabel González**: Por exemplo, o de Payasolandia, ¿a que hora acabou?. Contesta **Carmen Verde**: Era un venres, pero bueno, o baile está autorizado para os domingos.

Continúa **Isabel González** dicindo: Vale, pero por favor contestádelles que non costa ningún traballo e dade explicacións á xente, que moitas veces ao mellor falando xa arranxades igual sen chegar a estes extremos. Intervén o **alcalde** dicindo: No tema dos locais hai moita demanda, hai moita picaresca por así dicilo detrás dalgunhas solicitudes. Por iso nas solicitudes agora tamén se fan constar outros aspectos. Intervén **Carmen Verde** dicindo: Tamén é a primeira vez que un domingo non se pode facer, desde fai un ano.

Contesta **Isabel González**: Eu digo que a esa xente que presentou ese escrito se lle conteste, xa que se presentan un escrito, tedes que contestar. Intervén **Pilar Candocia** dicindo: Pero que se conteste ao escrito, se alguén presenta un escrito o normal é contestar. Intervén o **alcalde**: Contestar o escrito si, pero é o que di Carmen, é a primeira vez que non se pode facer. Contesta **Pilar Candocia**: É un procedemento administrativo, entón hai que contestarlles e nada mais. Di **Carmen Verde**: Xa contestou o alcalde. Non a eles, pero a Rosa que foi quen o solicitou sí. Ten que contestarlle el que é a quen vai dirixido.

Quinta pregunta.- Continúa **Isabel González Cancela** dicindo: Quero preguntar por varios escritos sen contestar. Un escrito que xa recordei no pleno pasado e dixeran que non me contestaredes é o que presentei por rexistro o 26 de novembro sobre se o Concello solicitou a subvención do programa de inserción laboral de mulleres vítimas de violencia e de non ser así cales foron os motivos, e non se me contestou. Intervén o **alcalde** dicindo: Xa se lle contestou aquí, se lle deu unha contestación no pleno. Intervén **Isabel González** dicindo: Eu revisei a acta enteira, e na acta non esta, e todo o que é rogos e preguntas recóllese na acta. Di o **alcalde** : Creo recordar que se lle contestara a unha parte.

Continúa **Isabel González** dicindo: O 25 de setembro presentei outro escrito, sobre o concurso do transporte adaptado, onde pedía os informes do departamento competente, non sei cal era, se contratación, intervención, secretaría, sobre o estado no que se atopa ese concurso. Despois de tanto tempo, quería saber se ese concurso a día de hoxe está en vigor, se é posible a súa resolución ou polo contrario hai que anulalo e volvelo a licitar. En setembro tamén, Bernardo, non recordo xusto agora a data, tamén pedimos que se nos deran as obras que se fixeran nos colexios durante o verán. Tampouco tivemos resposta algunha. Contesta o **alcalde** dicindo: Se deu acceso ao expediente das obras que se relacionaban nun proxecto. Intervén **Isabel González** dicindo: Eu pedíalle a relación, porque por exemplo, eu non estou no consello escolar pero non se fixeran as limpeza que se fan todos os anos e todo iso eu llo poñía no escrito. Contesta **Bernardo Moar**: Ao mellor me equivoco, pero eu creo que o que me pediades en setembro eran as obras se fixeran nos institutos. Intervén **Isabel González** dicindo: Non, naquel en concreto non, era sobre todo de limpeza en xeral e tampouco tivemos contestación ningunha. Intervén **Bernardo Moar** dicindo: Limpezas xerais se fixeron ao comezar o curso.

Continúa **Isabel González** dicindo: Despois, con respecto ao escrito que me mandou o outro día o alcalde con respecto ao regulamento do transporte adaptado, eu non sei se antes de mandarmos o viu a súa concelleira, pero me deu a impresión que non viu, porque se o viu dubido que me deran traslado, eu so digo iso. Di o **alcalde**: Non sei, erros tamén se cometen. Continúa **Isabel González** dicindo: Eu so digo iso. Dubido que me dera traslado. Tampouco se recollen moitas das cousas que eu dixeran, nese momento, por iso eu dubido que ela teña constancia do traslado dese escrito que vostede me fai chegar a min.

Intervén a concelleira do grupo municipal socialista **Carmen Fraga Crespo** para formular as seguintes preguntas:

Sexta pregunta.- A miña pregunta é para Alfredo. Eu quería saber en Ventosa, a estrada que vai de Portomouro a Roxos, esa estrada foi reparada fai moi pouco tempo, e xa ten dous baches moi grandes, un abaixo de Bello e outro. Contesta o **alcalde** dicindo: Xa os arranxaron, mandamos un escrito á Xunta con ese tema e xa o arranxaron.

Sétima pregunta.- A seguinte pregunta é se ten coñecemento de que en Trasmonte, na

maior parte dos sitios, por exemplo onda o local social, e a pista que vai cara a Suevos, iso todo non ten luz. ¿Hai algún motivo para iso?. Contesta **Alfredo Taboada**: Roubárono e agora vámoslle meter cable de aluminio a ver se como ese non ten saída o deixan en paz, porque senón é insoportable, póñeno agora e á semana desaparece, parece que están esperando a que o montes. Agora váiselle meter aluminio. Continúa **Carmen Fraga** dicindo: Dende o local social de Trasmonte, indo para Suevos non hai nin unha soa luz, e é todo monte.

Oitava pregunta.- ¿Cando se vai facer a obra da estrada que vai de Portanxil ata o local social? ¿Hai previsión de facela pronto? É que está moi estropeada. Contesta **Alfredo Taboada**: Esa é do POS deste ano, oxalá viñera iso pronto, que no verán deixabámola planchada. Continua **Carmen Fraga**: É que está con bastantes baches. As beiras están moi estropeadas e os coches teñen que arrimar e é moi perigoso. Contesta **Alfredo Taboada**: Se ten moitos baches en canto levante un pouco o tempo irémola parcheando, ata que veña o POS. Continúa **Carmen Fraga**: Oxalá viñera pronto porque as beiras están moi estropeadas, os coches teñen que arrimar e é perigoso. Contesta **Alfredo Taboada**: Oxalá viñeran pronto, por desgracia xa verás, virán alá para o inverno.

Novena pregunta.- A última pregunta é para saber se fuches a ver o “camiño da misa”, ¿limparon e repararon? É que me dixeron hai unha semana que está aquilo tremendo. Contesta **Alfredo Taboada** dicindo: Xa o foron a limpar, iso me dixeron a min. Preguntei moitas veces polo camiño da misa, pero para a semana voume acercar para asegurarme, a ver se é verdade que o limparon.

Intervén o concelleiro do grupo municipal socialista **Francisco Villaverde Marcos** para formular as súas preguntas:

Décima pregunta.- ¿Hai algunha previsión, para as gradas do campo do Milladoiro? Contesta **Eugenia Martín**: Previsión exacta no hay, pero se está licitando. Contesta o **alcalde**: Xa está para licitarse, pero temos que intentar encadrar a licitación e que se empece a obra cando menos prexudique a utilización do campo, cara ao verán. Esa é a previsión coa que traballamos.

Undécima pregunta.- Unha pregunta que xa fixo tamén Susana, sobre o arranxo dun trozo da Travesía do Porto. Contesta **Alfredo Taboada** : Xa se comentou con Martínez Montes e dixo que tan pronto viñera o vai a arranxar.

Décimo segunda pregunta.- No semáforo que está para a Casa da Cultura, hai unha inclinación bastante grande, case como unha cuneta, que se encharca de auga e cando se quere apretar o botón hai mais dun metro de auga e non se da alcanzado. A ver se houbera algunha forma de tapar iso para que non se acumule aí a auga. Contesta **Alfredo Taboada**: Poñer unha rejilla de desaugue unicamente.

Intervén o concelleiro do grupo municipal socialista **José Francisco Doval Galán** para formular as súas preguntas:

Décimo terceira pregunta.- Quería preguntarlle a Alfredo que xa hai dous ou tres meses que lle preguntara pola posibilidade de poñer unha praza de minusválidos nas proximidades do quiosco na praza de Chavián, solicitada por COGAMI. ¿Como vai o tema?. Contesta **Alfredo Taboada**: Xa cho dixeran da outra vez. Hai que pedirlle á Policía que nos faga un informe para poñela xunto á parada de bus. Habería que quitar un trozo á parada de bus, para poñer unha praza de minusválidos. Non sei se lle estorbará ao bus, pero non creo que lle estorbe moito. Alí era ideal porque para ir ao quiosco poden parar alí, e non na parada de bus.

Décimo cuarta pregunta.- Outro tema, o dos semáforos, porque creo que temos un pequeno problema cos semáforos da avda. da Maía coa Travesía do Pedregal e tamén na avda. da Maía coa rúa do Pedregal, nos dous casos. O cruce de avda. da Maía coa rúa do Pedregal, diante da Praza da Canela, ese semáforo para os peóns tarda moitísimo en poñerse en verde para os peóns porque se salta unha fase, é dicir, paran os coches, da paso aos coches da rúa Pedregal para que se incorporen á avda. da Maía, pero non lle da paso aos peóns ata a seguinte vez e dura moi pouco tempo. E arriba, xa diante da nave onde está a brigada, o semáforo da travesía do Pedregal, é dicir, da rúa que ven do Centro de Saúde está sempre en intermitente para os coches, en ámbar e en verde para os peóns; e no momento no que o semáforo da avda. da Maía se pon en vermello e da paso aos peóns, o outro semáforo segue dando paso para os coches que veñen

de alí. O sitio é moi perigoso, xa van varios accidentes por este motivo, porque os coches que se incorporan van mirando para abaixo, para a esquerda, cando teñen a xente cruzando a dereita. E moitos que non coñecen ben a zona non ven onde están os coches parados porque lle quedan lonxe e aínda despista mais porque non queda inmediatamente no cruce. Recentemente tivemos un atropelo dunha persoa que nese momento tiña dificultades para cruzar, xa que ía con muletas. Eu non son experto niso, pero creo que teñen que botarlle un ollo. Na miña opinión se se pon en vermello o da avda. da Maía ten que estar en vermello tamén o outro, de xeito que ese coches poden incorporarse igual co semáforo en ámbar á avda. da Maía porque teñen carril de incorporación tanto para meterse para abaixo como para irse para Brión. Senón que se distribúa doutro modo, pero polo menos cando estea en vermello na avda. da Maía, que estea en vermello o outro. O mesmo pasa tamén na rúa Poeta da Maía, porque non esta regulado nese semáforo do lado e aí xa vin algún atropelo por ter aceso os que veñen de Poeta da Maía co paso dos peóns na avda. da Maía. Un día diante das miñas narices, un rapaz cruzou rápido o outro viña con présa de Poeta da Maía e estampou ao rapaz, afortunadamente só foi co espello retrovisor, pero o tortazo foi bo. Eu xa digo, botaría un ollo porque ten riscos. Intervén o **alcalde** dicindo: Revisarémolos. Destes de aquí xa me informaron que tardan 1 minuto e 30 segundos en cambiar, os que falamos o outro día, Pilar. Comenta **Pilar Candocia**: Pero non funcionan os pulsadores. Contesta o **alcalde**: Os pulsadores non funcionan. Di **José Francisco Doval**: Os pulsadores non valen pa nada. Intervén **Pilar Candocia** dicindo: ¿E por qué non os quitan? É que despistan. Eu mesma ás veces me despisto e despois penso para que lle estou dando se non valen. A xente non o sabe. Contesta o **alcalde**: Eu comenteillo pero me din que non se deben de retirar o pulsador. Pregunta **Pilar Candocia**: ¿A que se debe? Porque se no funcionan! Contesta o **alcalde**: Porque me di que pode funcionar nalgún momento.

Intervén o concelleiro do grupo municipal socialista **José Manuel Miñones Conde** para formular as súas preguntas:

Décimo quinta pregunta.- Quería saber que data de finalización manexan das obras do campo de fútbol de Bertamiráns.

Décimo sexta pregunta.- Tamén quería saber se se reuniu co representante de Ruafer neste último ano, polo centro de usos múltiples de Aldea Nova.

Décimo sétima pregunta.- ¿Cal é o problema que está a acontecer co alumeado de Aldea Nova, que falla en bastantes rúas? Aí non é o cable.

Décimo oitava pregunta.- Tamén quería que quede en acta constancia de que as pantallas informativas das casas de cultura, en ningunha delas están a funcionar, a de Bertamiráns leva polo menos 6 meses e a do Milladoiro uns días vai e outros días non. Entón non sei se é simplemente porque non se acenden, porque as outras si que están en funcionamento, e tamén se teñen previsto algunha actuación de programación destas pantallas porque se está a repetir información practicamente de hai 3 ou 4 anos.

Décimo novena pregunta.- Para a ultima pregunta gustaríame cederlle a palabra á persoa que está mais implicada, porque loxicamente levan aquí aguantando 4 horas e porque probablemente a pregunta que vaia facer ela é a mesma que teño eu anotada.

Intervén o **alcalde** para dicir: Sobre o tema da finalización do campo de fútbol, miraremos porque está bastante avanzado, retrasouse polo tempo, por problemas climatolóxicos. Con Ruafer se tiveron reunións o ano pasado e este ano tamén houbo conversas; esperamos pechar un acordo proximamente. Intervén **Alfredo Taboada** dicindo: O alumeado de Aldea Nova estase cortando porque hai un fallo que non se da localizado por ningún lado; entón vamos cortando a sección de cada rúa e deixalas individuais, para ver se así dunha vez por todas sabemos cal é. O parque que hai arriba, onde está a piscina, quedou sen luz para ver se é iso o que nos estaba provocando o fallo desa rúa, está pendente diso, non está esquecido, o que pasa é que non o dan localizado; revisaron punto por punto e non atopan o fallo.

Intervén o **alcalde** para dicir: Sobre as pantallas informativas revisarémolas, sei que algunhas veces funcionaban e tiveron algún problema, pero revisaremos a ver cal é o motivo polo cal non están a funcionar.

E en relación a alusión do concelleiro Miñones o publico non poder intervir nos plenos. E sendo as 23:59 horas do 27 de febreiro de 2014 o señor alcalde deu por rematado o acto e levantou a sesión, de todo o que eu como secretaria certifico.

Vº Prace
O alcalde

A secretaria